

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9



全部四十一卷 合考十卷

第一

佛祖綱目

一之十八

C40
4514
(131)

C 40-4514

了翁上座請大藏及有
家書置之武州紫雲山
我微笑塔院庫府中永
為學者不敢許出院內
當山二世鐵十機謹誌



B 64853

佛祖綱目序再來梵文藏五宗大藏經

余不佞浮沉史局垂五十年而知古今事無更難於
史者無論正史難即偏記小錄亦難無論稗史難即
瓊語雜簿亦難若更進而史天史地又進而史仙史
佛自非以山河為法身以人天為手眼者未有能撮
其要而蒼其成者也心空居士以三十年精力彙為
佛祖綱目一書於是梵網有總持法門有紀載宗教
有源流廢興有考覈而合之則曰此七佛以來一部
大史也宋元徽中王儉為七志僅以佛書附圖譜之
末梁初命任昉於文德殿列藏裂書於華林園另

支那

五五

集釋典其後阮孝緒博采經籍獨尊佛錄於七錄之外然亦不過資博覽示瑰異而已唐宋以來宗學熾盛枝葉各分自景德傳燈錄出續之者至合爲五燈於是曹溪之後思讓再分馬祖以來五宗各顯至宋僧法槃別立教宗以法華爲經天台爲統止觀爲門此佛祖統記所繇作也迨元僧智常復作統載名依統記而立例則殊始用史家編年之法其意以宗爲主以教爲輔凡淨行神足性相義觀無所不備而識者摘其漏誤至不可寘辨蓋史之難如此居士宿身了了自謂明教嵩再來故於定祖正宗大義凜凜巨

綱細目標識精詳至其畧化跡而重機錄合宗乘而歸淨土則又善誘曲導無非融和水乳吹亮薪傳俾見性成佛之旨人人開卷直下領會將居士顯化報恩之願於是焉畢矣何至如小師諍士橫分正閏妄劃南北始以病史而究爲宗教戈矛哉嗟乎肅昭仗正書落窖坑崔浩解詭諸族冤駢覆至使貞臣節士默標張儼之文私存孫盛之本木天金馬奔厠盈途豈如旃檀林邊可以逍遙撰述大圓海畔從無意外風波人鬼天龍俱供筆削闡賊鹿苑倚作直廬如居士之肩史責誰謂極矣國中珥毫簪筆無其位無其人

也
皇明崇禎歲在甲戌仲秋吉旦 賜進士出身資政
大夫太子太保禮部尚書兼翰林院學士掌詹事府
事 實錄副總裁董其昌撰

佛祖綱目錄引

刻分燈錄既竣則諸善信夙生種子已蘇蘓發動矣
然心空氏弘願深慈增進無已且其一生精力注之
佛祖綱目一書蓋蒐輯全藏纂要鉤玄而用編年法
詮次焉以迦文為教主以西竺東土諸祖一花五葉
為正宗以經教義觀淨行神足為旁翼洎宰官長者
諸善知識靡不賅攝雖倣通載之例而盡刊七誤之
短採擷叅訂功兼勞倍洵可謂貝笈之巨筏法印之
金鏡令學人薰習其中不待遍閱三乘十二分教而
心知眼孔一時洞開如渴飲天漿如饑餐王膳又如

東海狂且忽游衆香之國負茲孱子扶筇百藥之肆
其踴躍歡喜又詎可量哉卷凡四十而羸彙爲十二
策將託重十二大法力人流通演化業有獨任之者
不佞則謂末法凌夷盡大地人迷却向上一着與其
獨爲君子寧若善與人同於是迺有分募之說悉照
徑山規式各刻姓名卷後庶幾財法二施一雨普潤
即半滿功德不且平等無二乎莫道心空居士特
漫天頓網打鳳羅龍也

崇禎五年壬申四月

佛示生日黃廷鵠澹志甫題

余編次佛祖綱目四十一卷甫竣崇禎壬申春黃澹
志王心岫諸君子倡導勸緣謀付剞劂是年七月余
忽患脾疾老年精血乾枯似無生理余於生死業已
坦然獨是書佛祖命脉所關投勘刊刻刷印流通須
一一躬親非歲月了局可柰何是夜夢人持書一封
像一幅啓視書云知汝欲開坦然書院像則夢中竊
計此丁南羽所畫觀音大士像也明旦脾疾遂愈因
追憶萬曆丁巳元旦五更夢入一殿宇莊嚴高聳金
碧輝煌大士身長丈餘南面而立余方拜起大士手
抱一嬰兒授余曰無智亦無得以無所得故豈所爲

坦然者即無所得之真種子令余小子普覺大千盡
 未來際而共證無生乎阿那含拘尼佛偈曰佛不見
 身知是佛若實有知別無佛智者能知罪性空坦然
 不怖於生死實有知則無所得無所得則坦然此正
 先佛後佛互證教外別傳之秘旨而余小子編次四
 十一卷綱目之微意也學者其無忽諸

壬申臘月三十日五更夢一縉紳相貌非常揖余
 而謝曰拙稿蒙老先生訂贖余曰老先生真稿未
 知尚有幾篇曰四十一篇是日偶人持嘉興新進
 談生考卷來謁視首題下註云宗師考取第幾十
 名首卷次題云太尊考取第幾十名首卷既云幾
 十名又云首卷余怪問故則曰卷者篇也始悟夢
 中四十一篇者乃綱目四十一卷其事關佛祖冥
 證不得不附跋於此佛弟子朱某謹識

勸記善信助貨數目

第一本 序疏起至十八卷止
 該銀壹拾陸兩叁錢

王元瑞壹拾陸兩叁錢施刻

第二本 該銀壹拾陸兩
 十九卷至二十八卷

張翼軫壹拾陸兩施刻

第三本 該銀壹拾伍兩捌錢
 二十九卷至三十一卷

李凌雲 錢士貴各伍兩 莊元禎 朱時恩各

貳兩玖錢共施刻

第四本 該銀壹拾伍兩伍錢
 三十二卷全

鄒孟仁壹拾伍兩伍錢施刻

第五本

三十三卷全
該銀壹拾陸兩

黃廷鵠

何萬化

馮明玠

沈匡濟各肆兩共

施刻

第六本

三十四卷全
該銀壹拾肆兩

李耆卿

陸景暉

馮鼎位

張一鵠

徐宸葵

各貳兩捌錢共施刻

第七本

三十五卷全
該銀壹拾兩肆錢

姚士芳同男世雋貳兩陸錢

葉師曾

董祖和

葉有英各貳兩陸錢共施刻

第八本

三十六卷全
該銀壹拾陸兩

鄒孟浩壹拾陸兩施刻

第九本

三十七卷之上
該銀壹拾叁兩

姚士慎同男世曙壹拾叁兩施刻

第十本

三十七卷之下
該銀壹拾陸兩

徐兆禎 章輔世 張正 陸慶紹 屠旭各貳

兩 王鈺 王鉉各叁兩共施刻

第十一本

三十八卷至三十九卷
該銀壹拾肆兩叁錢貳分

朱時恩玖兩壹錢叁分

張宏

章肇開

章甲

章本練

吳汝昌

明甄

朱大紹各壹兩

第十二本

四十卷至四十一卷
該銀壹拾柒兩伍錢

王元瑞壹拾柒兩伍錢施刻

佛祖綱目迥異他書上續慧命下度群品真心樂助者固已旋趨於覺路見聞隨喜者亦且共脫夫迷途本願大法流通統祈自他兼利真如福德各各無邊至於王心岫居士捐貲助刻首末二本外復助刊刻刷印銀貳拾兩特願過去先祖王朝松先祖母毛氏先父王孫熙先母張氏等盡獲超昇現在側室顧氏長男王鉦生母盧氏次男王鉉生母盧氏等均蒙保祐本色道人彈指無非佛事云

皇明崇禎癸酉孟冬日心空居士朱時恩敬書

佛祖綱目序

余輯是書竊有深願經云自未得度先度人者菩薩發心自覺已圓能覺他者如來應世曰發心正以求其自覺曰應世正以滿其初心心之未形杳杳冥冥不見一物無佛無祖無綱無目者此性之纖塵不立也心之已形浩浩蕩蕩不遺一物有佛有祖有綱有目者此性之萬法朗然也故曰不可以有心求不可以無心得不可以語言造不可以寂默通離四句絕百非如空裏栽花如波心踏月無汝湊泊處無汝擬議處畢竟如何以佛祖遣佛祖以綱目奪綱目神而

明之存乎其人而已是書草創於萬曆三十八年之庚戌卒業於崇禎四年之辛未嘔心枯鬚者歷二十有一年遂成佛祖綱目四十一卷一時蓮社行人相與謀付剞劂作人天眼目余乃歡喜踴躍而說偈言偈曰我述此書不爲名聞事理俱備權實雙行庶幾觀者了如鏡明開卷展讀發無上心不願佛子耽着句味但願友求直下便是剪葛藤根伐無明樹不願佛子瞥生知解但願窮源掃開奇怪赤手歸家塵塵出礙不願佛子真高我慢但願知非靈光顯現佛不奈何魔軍自散不願佛子輕忽毘尼但願性戒無犯

無持赤肉團上出摩尼珠不願佛子沉空枯坐但願明心了無退墮管甚蒲團破與不破不願佛子虛度光陰但願精進拳拳服膺萬年一念大地平沉不願佛子籠侷顛預但願悟徹擊碎疑團竿頭進步桶底踢穿不願佛子浮飾外護但願實心圓修六度法海無邊剎刹涉過我作此偈諸佛證明滄海可竭須彌可崩而此願力與佛長存

附刻原疏

伏念時恩博地凡夫渺無福慧四十餘

載虛度光陰幼承父母教育竊佩孔聖遺言旣而母氏先亡遂慕佛門教典當其步趨乎儒也幾欲

撰述
效顰而攻乎佛及其歸依乎佛也又因嘗鼎而薄
乎儒皆緣不滙大聖之淵源遂致下同流俗之軌
轍往歲萬曆丁未正當四十四歲發無上心勤求
妙道晨夕參叩不敢怠違夢寐之間默蒙印可始
信千古法道匪從人得河沙妙用總在心源度生
爲急僧俗何拘愚者自迷妄分儒釋原夫世尊
說十二部經而人天瞻仰孔子作春秋而亂臣賊
子懼苟可開世間眼目豈復愛一已髮膚今恩竊
不自揣思報佛恩照依歷代年號編輯佛祖綱目
意倣乎孔子名同乎紫陽須以十年或可卒業顧

孔子聖人也春秋猶世諦也當時且冒罪我之嫌
况恩何人斯所編年而載者皆天中天聖中聖非
古佛現身卽菩薩救世上自天魔外道下至拘儒
曲士能無惱亂或多謗毀用是投誠懇求三世
諸佛十方諸大菩薩天龍八部護法善神被無量
之神力多方護持假莫大之靈通曲垂方便苦心
思索智慧脉脉自流殫力校讐精神奕奕長旺或
奇書古帙或斷簡殘編奚所求而弗獲或助以刻
貲或牖以知識將善士之必逢數年彙集無異剎
那千葉詞章如出一氣帙成而鷺嶺芳規儼若未

散展畢而龍華勝會預掇目前無論後有作者相
續不斷化爲無盡之燈卽今有志禪那一覽無遺
觸目菩提之路 明主收入藏中流通並天長地
久鬼神不忘遺囑呵護同玉策金函天魔外道拱
手歸降曲士拘儒回心嚮道自非大慈大力何以
成始成終謹當發心纂集之初不勝祈禱欵誠之
至時萬曆庚戌四月八日弟子朱時恩謹疏

時恩旣於如來像前發弘願已屢獲瑞夢不一
而足或夢三教後聖人私感之私服之或夢明
教嵩禪師再來後聖者以是書所載乃先聖化

跡讀是書而興起者皆三教後聖人也私者非
佛非祖以一俗士而編輯佛祖綱目卽孔子所
謂其義則丘竊取之者雖公而亦私也感之者
因是書而明心見性自應銘感之不忘也服之
者因是書而惑斷執空自應佩服之無斃也明
教再來者昔以比丘而著傳法正宗記今以居
士而著佛祖綱目前後若出一人也自是而知
佛祖加被我矣雖蒐羅未盡而千聖不傳之奧
旨超出語言文字之外者已若含若吐於是書
古德云將此深心奉塵刹是則名爲報佛恩

佛祖綱目凡例

一佛祖 福慧兩足正覺無上故名爲佛明佛心
宗行解相應故名爲祖現在賢劫第四尊佛號
曰釋迦王此五濁大千世界釋迦傳迦葉二十
八傳至達磨是謂西天二十八祖達磨傳慧可
六傳至惠能是謂東土六祖嗣後五宗繼興法
法相傳無忝祖位 教門則有瑜伽宗南山宗
天台宗慈恩宗賢首宗

一綱目 綱者大綱目者細目儒書綱目爲世間
法善惡俱陳以備法戒故有褒有貶佛祖綱目

爲出世間法專爲託彼已成之佛祖顯我自性
之佛祖故無褒無貶

一卷帙 如來示生印度大教漸被支那則此方
著述斷以釋迦爲主今不論篇數多寡以一甲
子週爲一卷起周康王二年甲子止洪武十六
年癸亥總計四十一甲子成四十一卷仍編字
號以便查考

一年號 西土東土不同世法道法亦異今每卷
綱目前先將此土年號注入甲子內然後專書
佛祖機緣化跡庶不混雜

一五時 如來示現有五時一降生二出家三成道四說法五涅槃如來說法亦有五時一華嚴二鹿苑三方等四般若五法華

一機緣 教外別傳纔出母胎便已漏逗何待拈花綱目於涅槃後純錄機緣者良有深意上流之士若於此處覷得破時一千七百則公案不消一捏

一化跡 神通變化雖佛祖亦時藉以折伏魔外實則正法不係乎此如瀉山雲門道滿天下未聞以三世國王失通之故而少貶其宗風故綱

目雖不削化跡亦不滯化跡

一宗教 教是佛語宗是佛心但愁心不作佛不愁佛不解語然通宗不通教開口便亂道故是書以傳法正宗爲主而教尤不可不看

一淨土 佛開淨土一門實救世之良方亦叅禪之捷徑達磨未來遠公始創蓮社教人一心念佛要其歸極輿直指單傳毫髮無異近世雲棲宏師古佛再來儼然德山臨濟而不用棒喝單提念佛話頭可謂善學柳下惠不師其跡讀綱目者直須識得此意

一宗派 調字號第三十一卷馬祖石頭會下有
二道悟不可不辨一道悟嗣石頭東陽張氏子
初叅國一後謁石頭頓悟住荊州城東天皇寺
弟子三人一慧真一文賁一幽閑協律卽符載
撰碑一道悟嗣馬祖渚宮崔氏子初謁石頭不
契次謁忠國師後謁馬祖言下大悟授記返荆
門節使以天王嗔責造天王寺於府西供師弟
子一人龍潭崇信荆南節度使丘玄素撰碑據
此則龍潭嗣天王天王嗣馬祖無疑傳燈乃誤
列於石頭法派而宋景濂護法後記亦因之何

也况唐聞人歸登南嶽碑圭峰答裴相國宗趣
權德輿馬祖塔銘皆以天王嗣法馬祖而佛國
白達觀穎呂夏卿張無盡亦皆著辨證傳燈之
誤綱目查明一一改正

一辨訛 騰字號第三十四卷乾祐庚戌吳越王
以誕辰飯僧王問永明今有真僧降否曰長耳
和尚乃定光佛應身也王趨駕叅禮稱爲定光
出世長耳但云永明饒舌遂跣趺而化令參號
永明與長耳同嗣雪峰初住翠巖天福丁酉王
請住龍冊卽所問之永明也顯德甲寅王始建

永明寺請道潛居之宋建隆辛酉道潛化王乃請延壽住永明自辛酉遡至庚戌凡十有一年此時壽未出世永明寺亦未建安得謂王所問之永明乃延壽之永明哉佛書中如此類者頗多而遺漏處亦不少姑俟博雅詳訂再續

一序文 綱目卷首除自述願文及原疏外止錄宋景濂序傳法正宗記及護教編後記二首更不敢乞文名公以相粉飾

佛祖綱目凡例

此書業已鐫成於癸酉乃甲戌秋思翁 予告南還一見欣然願序洪博典要遂爲此書冠冕

傳法正宗記序

宋 濂

表大法之真傳起群生之正信宜莫如書然而真丹身毒相去絕遠梵言華言重譯或殊况屢遭滅斥之禍生乎其後者必蒐羅墜逸徧觀會通然後能定是非之真諛聞之士苟獲窺其一偏遂執爲確然之論斯亦過矣嗚呼闢邪說之膠固伸正義於千載之下不有先覺學者將何所從哉昔者濂讀涅槃經及智度論頗知釋迦文佛以正法授迦葉世世相傳具有明證故自前魏支彊梁樓至洛邑譯續法傳自七佛至二十五祖婆舍斯多而止東晉佛馱跋陀羅至廬

山所譯禪經自迦葉至二十八祖達摩多羅而止逮夫後魏之時崇道屏釋而沙門曇曜蒼黃逃竄單錄諸祖之名匿巖穴間僅及二十四祖師子尊者而止佛運重啓曇曜進爲僧統吉迦夜等遂因之爲付法藏傳其去前魏已一百九十餘年東晉亦六十二年矣東魏邴連耶舍至鄴復備譯西域諸所傳授事跡其次第與禪經不差毫髮則全闕之分有不待辨而自明矣唐興曹溪大弘達磨之道傳布益盛義學者忌之而神清爲甚乃據法藏傳所列謂師子遭難絕嗣不傳猶以爲未足誣迦葉爲小智不足承佛心印

指禪經實後來傳會難以取徵而好議論之徒紛紛而起矣宋明教大師契嵩讀而病之博采出三藏記洎諸家紀載釋迦爲表三十三祖爲傳持法一千三百四人爲分家畧傳而旁出宗證繼焉名曰傳法正宗記復畫佛祖相承之像明其世系名曰定祖圖申述禪經及西域諸師爲證以闡義學者之妄名曰正宗論共十二卷其衛道之嚴凜凜乎不可犯也濂竊聞之太平真君之七年魏太武用崔浩言宣告征鎮佛像胡書皆擊破焚燒當是時諸種經論多煨燼之末屋壁之深藏蓋至於久而後出以此觀之曇曜之

流固未必能見禪經至於諸師之論義學者亦未必能盡聞之顧執一時單錄不全之文而相爲詬病猶將十指而掩日月之光一口而吸滄溟之水多見其不知量也大師之辨析夫豈得已者哉甬東祖臬禪師以誠篤契道汲汲焉惟恐法輪不運合衆緣重刻以傳嗚呼書不流通與無書等大師固有功於宗乘而臬公之爲則又有功於大師者也皆不可以不記因追序其作者之意於首簡云

釋氏護教編後記

宋 濂

西方聖人以一大事因緣出現於世自從鹿野苑中

直至於跋提河演說苦空無我無量妙義隨機鈍利分爲頓漸無小無大盡皆攝入薩婆若海旣滅度後其弟子阿難陀多聞總持有大智慧結集爲修多羅藏而諸尊者或後或先各闡化源優波離集四部律謂之毘尼金剛薩埵於毘盧遮那前親受瑜伽五部謂之秘密章句無著天親頰升知足天宮咨參慈氏相與造論發明大乘謂之唯識宗旨西竺龍勝以所得毘羅之法弘其經要謂之中觀論燉煌杜法順深入華嚴不思議境大宣玄旨謂之華嚴法界觀毘尼之法魏嘉平初曇柯羅始持僧祇戒本至洛陽而曇

無德量諦等繼之立羯磨法唐南山澄照律師道宣作疏明之四分律遂大行是爲行事防非止惡之宗薩埵以瑜伽授龍猛授龍智智授金剛智唐開元中智始來中國大建曼荼羅法事大智道氤大慧一行及不空三藏咸師尊之是爲瑜伽微妙秘密之宗唐貞觀三年三藏玄奘往西域諸國會戒賢於那蘭陀寺因受唯識宗旨以歸授慈恩窺基基乃網羅舊說廣制疏論是爲三乘法相顯理之宗梁陳之間北齊惠聞因讀中觀論悟旨遂遙禮龍勝爲師開空假中三觀止觀法門以法華宗旨授慧思思授天台國

師智觀觀授灌頂頂授智威智威授惠威惠授玄朗朗授湛然是爲四教法性觀行之宗隋末順以法界觀授智儼儼授賢首法藏至清涼大統國師澄觀追宗其學著華嚴疏論數百萬言圭峰宗密繼之而其化廣被西方是爲一念圓融具德之宗瑜伽久亡南山亦僅存其盛行於今者唯天台慈恩賢首而已此則世之所謂教者也世尊大法自迦葉二十八傳至菩提達摩達摩悲學佛者纏蔽於竹帛間乃弘教外別傳之旨不立文字而見性成佛達摩傳慧可傳僧璨璨傳道信信傳弘忍忍傳曹溪大鑑禪師惠

能而其法特盛能之二弟子懷讓行思皆深入其間
奧讓傳道一一之學江西宗之其傳爲懷海海傳希
運運傳臨濟慧照大師義玄玄立三玄門策厲學徒
是爲臨濟之宗海之旁出爲濶山大圓禪師靈祐祐
傳仰山智通大師慧寂父唱子和微妙玄機不可湊
泊是爲爲仰之宗思傳希遷遷之學湖南宗之其傳
爲道悟悟傳崇信信傳宣鑑鑑傳義存存傳雲門匡
真大師文偃偃之氣宇如王三句之設如青天震雷
聞者掩耳是爲雲門之宗玄沙師備偃之同門友也
其傳爲桂琛琛傳法眼大師文益益雖依華嚴六相

唱明宗旨迥然獨立不涉凡情是爲法眼之宗遷之
旁出爲藥山惟儼儼以寶鏡三昧五位顯三種滲漏
傳曇晟晟傳洞山悟本大師良价价傳曹山元證大
師本寂而復大震是爲曹洞之宗法眼再傳至延壽
流入高句驪仰山三傳之芭蕉徹當石晉開運中遂
亡弗繼雲門曹洞僅不絕如綫唯臨濟一宗大用大
機震盪無際若聖若凡無不宗仰此則世之所謂禪
者也嗚呼教之與禪本無二門依教修行蓋不出於
六度梵行而禪定特居其一繇衆生根有不齊故先
佛示化亦不免其異耳奈何後世各建門庭互相盾

撰述
予教則譏禪滯乎空寂禪則譏教泥乎名相籍籍紛紛莫克有定是果何爲者耶此則教禪異塗猶可說也自禪一宗言之佛大勝多與達摩同學禪觀達摩則遠勢真宗勝多所見一差遂分爲有相無相定慧戒行無得寂靜六門非達摩闢之安能至今廓如也慧能與神秀同受法於弘忍能則爲頓宗秀則別爲漸宗荆吳秦洛各行其教道一神會又同出於能者也道一則密受心印神會則復流於知解一去弗返而其末流若大珠明教慈受輩尚何以議爲哉自教一宗言之慈恩立三教天台則分四教賢首則又分

五教龕妙各見漸圓互指終不能歸之一致可勝嘆哉此雖通名爲教各自立宗猶可說也自夫本教之內言之律學均以南山爲宗真悟智圓律師允堪著會正記等文識者謂其超出六十家釋義之外何不可者至大智律師元照復別以法華開顯圓意作資持記又與會正之師殊指矣不特此也四明法智尊者知禮孤山法慧大師智圓同祖天台同學心觀真妄之異觀三諦之異說旣已抵牾之甚雪川仁岳以禮之弟子又操戈入室畧不相容諫書辨謗之作逮今猶使人凜然也其他尚可以一二數之哉嗚呼毘

撰述
盧華藏圓滿廣大徧河沙界無欠無餘非相而非
緣而緣非同而別而別苟涉思惟卽非聖諦又
何在分教與禪之異哉又何在互相盾矛業擅專門
哉又何在操戈相攻遽背其師說哉雖然適長安者
南北異塗東西殊轍及其所至未嘗不同要在善學
者慎夫所趨而已比丘永壽嘗以闍僧一源所著護
教編示予自大迦葉至於近代諸師皆有傳贊文辭
簡古誠竒作也壽獨惜其不著教禪承傳同異之詳
請予爲記以補其闕畧予因以所聞疏之如右文繁
而不殺者欲其事之著明蓋不得不然也

王忠文公禱叢錄中載佛學一篇與此文同末一
段云佛之爲道本無二門自去聖旣邈源遠而流
益分於是師異指殊各建戶庭互相矛盾禪則譏
教爲滯於名相教則譏禪爲溺於空寂若律之爲
用雖禪教所共持而取舍各不同至於爲教禪之
學者又各立異以取勝一彼一此不相出入自教
宗言之慈恩立三教天台則分四教賢首則又爲
五教自禪宗言之慧能與神秀同受法於弘忍能
則爲頓宗秀則爲漸宗道一神會同出於能道一
則密契心印神會則復流於知解其不同如此至

撰述
佛前雜目卷第
若天台教宗之一也而四明知禮孤山智圓性善性惡之說如氷炭之不相投臨濟禪宗之一也而或以棒或以喝至橫川珙則復以聲偈其示人之要如杓鑿之不相合支派乖錯論說紛紜殆不得而悉數也忠文與文憲同里同門故其問學之相合如此

叙七佛

傳燈錄云古佛應世綿歷無窮難以悉數現在賢劫有千如來暨於釋迦但紀七佛案長阿含經云七佛精進力放光滅暗冥各各坐樹下於中成正覺又曼殊室利爲七佛祖師金華善慧大士登松山嶺行道感七佛引前維摩接後今之撰述斷自七佛而下

毘婆尸佛

過去莊嚴劫第九百九十八尊

長阿含云人壽八萬歲時此佛出世種剎利姓拘利若父盤頭母盤頭婆提居盤頭婆提城坐波波羅樹下說法三會度三十四萬八千人神足二一

鷲茶二提舍侍者無憂子方膺 偈曰身從無相
中受生猶如幻出諸形像幻人心識本來無罪福
皆空無所住

尸棄佛

莊嚴劫第九百九十九尊

長阿含云人壽七萬歲時出世種刹利姓拘利若
父明相母光耀居光相城坐芬陀利樹下說法三
會度人二十五萬神足二一阿毘浮二婆婆侍者
忍行子無量 偈曰起諸善法本是幻造諸惡業
亦是幻身如聚沫心如風幻出無根無實性

毘舍浮佛

莊嚴劫第一千尊

長阿含云人壽 萬歲時出世種刹利姓拘利若
父善燈母稱戒居無踰城坐婆羅樹下說法二會
度人一十三萬神足二一扶遊二鬱多摩侍者寂
滅子妙覺 偈曰假借四大以為身心本無生因
境有前境若無心亦無罪福如幻起亦滅

拘留孫佛

現在賢劫第一尊

長阿含云人壽四萬歲時出世種婆羅門姓迦葉
父禮得母善枝居安和城坐尸利沙樹下說法一
會度人四萬神足二一薩尼二毘樓侍者善覺子
上勝 偈曰見身無實是佛身了心如幻是佛幻

了得身心本性空斯人與佛何殊別

拘那含牟尼佛

賢劫第一尊

長阿含云人壽三萬歲時出世種婆羅門姓迦葉父大德母善勝居清淨城坐烏暫婆羅門樹下說法一會度人三萬神足二一舒槃那二鬱多樓侍者安和子導師 偈曰佛不見身知是佛若實有知別無佛智者能知罪性空坦然不怖於生死

迦葉佛

賢劫第二尊

長阿含云人壽二萬歲時出世種婆羅門姓迦葉父梵德母財主居波羅柰城坐尼拘律樹下說法

一會度人二萬神足二一提舍二婆羅婆侍者善友子集軍 偈曰一切衆生性清淨從本無生無可滅卽此身心是幻生幻化之中無罪福

釋迦牟尼佛

賢劫第三尊

長阿含云人壽一百歲時出世本在一萬歲時爲觀衆生無機可度至百歲劫末苦逼故出乎世種刹利姓瞿曇交淨飯母大清淨居舍衛城坐菩提樹下說法一會度人無數神足二一舍利弗二目犍連侍者阿難子羅睺羅 偈曰法本法無法無法法亦法今付無法時法法何曾法

幻寄居士瞿汝稷曰始予錄指月錄七佛第書
 其偈阿含化跡皆削焉既見世之人僮聞卽心
 卽佛者率多撥無報化乃悟昔人載此之妙密
 蓋偈闡法身之極致阿含示化跡之大畧可謂
 斷常俱遺事理兩融者矣傳燈成於道原而裁
 定於楊大年其旨不苟也因具錄之此錄稍錄
 神通亦以此

佛祖綱目叙七佛卷 終

佛祖綱目總次

全部綱目內所載雖西方聖人爲大千教主實遵
 東土帝王花甲編年紀號自序文起至末卷助贊
 姓氏止分列四十一卷共成十二策開後

第一策 董序 黃引許跋 自序 凡例 宋序 七

佛偈 首卷至十八卷

第二策 十九卷至二十八卷

第三策 二十九卷至三十一卷

第四策 三十二卷

第五策 三十三卷

第六策 三十四卷

第七策 三十五卷

第八策 三十六卷

第九策 三十七卷之上

第十策 三十七卷之下

第十一策 三十八卷至三十九卷

第十二策 四十卷至四十一卷 自跋 善信助

貲數目

佛祖綱目總次終

佛祖綱目卷第一 天字號

甲子 周康王二年起 巳丑 周昭王三十五年止

周姬姓起武王巳卯止赧王乙巳三十七主合

八百六十七年世尊乃第四主昭王二十六年

示生故今斷自昭王甲寅起 世尊生時此方

江河泛漲泉井溢出大地震動有五色光貫太

微宮王問群臣是何祥瑞太史蘇繇奏曰西方

有聖人生王曰於此何如繇曰此時無他一千

年後聲教被及王令刻石埋於南郊誌之云

寅甲釋迦牟尼佛示現受生

釋迦牟尼佛賢劫第四佛也然燈佛所爲善慧仙人
嘗買蓮花供佛又見地濕脫衣布地解髮覆之佛記
善慧汝過阿僧祇劫於五濁惡世當得成佛號釋迦
牟尼 賢劫第三尊迦葉佛時爲護明菩薩命終往
生兜率陀天爲諸天主說補處行亦於十方國土現
種種身爲諸衆生隨宜說法乃至作佛期運將至卽
觀今閻浮提諸衆生皆我初發心來所成熟者堪受
妙法餘國邊地皆不應生此世界迦毘羅國最爲處
中往古諸佛出興皆生於此諸族種姓刹帝利第一
瞿曇苗裔聖王之後淨飯王過去因緣具足清淨性

行夫妻真正堪爲父母旣作此觀遂集諸天子告言
我今不久捨此天宮生閻浮提出家學道成一切種
智設大法會廣利人天汝等亦當同受法食諸天子
歡喜踊躍各心念言菩薩不久當成正覺時菩薩乘
六牙白象發兜率宮降神母胎淨飯王夫人摩耶於
寤寐間見菩薩騰空來從右脇入影現於外如處琉璃
願見自身如日月照菩薩在胎晨朝爲色界諸天
說法日中爲欲界諸天說法晡時爲諸鬼神說法夜
三時亦復如是成熟無量衆生甲寅四月八日日出
時摩耶手攀無憂樹枝菩薩從右脇出時樹下生

七莖七寶蓮花菩薩墮蓮花上自行七步舉其右手而言天上天下惟我獨尊無量生死於今盡矣此生利益一切天人說是言已四天王接置寶几龍王吐清淨水灌太子身王以太子生時諸瑞吉祥遂名薩婆悉達此言時香山有一梵仙名阿私陀具足五通能斷疑惑以神通力騰空而來相太子已忽然悲泣王驚問故仙人答曰太子具三十二相年十九爲轉輪聖王若出家者成一切種智然王太子決定成一切種智轉無上法輪我今年已百二十不久命終生無想天不覩佛興不聞經法故自悲耳太子生七日

摩耶命終生初利天王囑姨母波闍波提養育太子初生口稱獨尊言已便默如諸嬰孩七歲王令學書訪國中第一聰明婆羅門名曰選友爲太子師婆羅門授以梵書法留書太子問閻浮提中有幾種書師默然又問阿字何義師又默然卽從座起問曰太子初生時自言天人之中最尊最勝此言不虛惟願爲說閻浮提凡有幾種太子曰閻浮提中梵書法留書護衆書疾堅書龍鬼書捷偕和書阿須倫書鹿輪書天腹書轉數書轉眼書觀空書攝取書具有天地八部四洲鳥獸等音聲諸書有如是等六十四種又

阿字是梵音聲此字義是不可壞亦是無上真正之道義凡如此義無量無邊婆羅門白王太子是天人第一之師云何欲令我教耶復令忍天教法太子自能通達忍天反禮太子

佛祖綱目卷第一 終

華亭居士王元瑞施刻此卷 青蓮居士對會稽焉存預書男之梅刻 崇禎壬申孟夏

佛祖綱目卷第二 地字號

甲子 周昭王三十六年起 庚辰 周穆王元年 癸亥 周穆王十四年止

壬申釋迦牟尼佛示現出家

佛年十七王娶婆羅門女耶輸陀羅為太子妃復增二妃一名瞿夷二名鹿野太子雖有二妃於靜夜中但修禪觀一日白王游觀初出東門淨居天化作老人頭白背偃拄杖羸步太子乃念日月流邁時變歲移老至如電身安足恃我雖富貴豈獨免耶云何世人而不怖畏復游南門淨居天化作病人兩人扶掖在於路側太子又曰如此身者是大苦聚云何世人

不知覺悟王聞切責諸臣有婆羅門子名優陀夷聰辯絕倫王令與太子友具說世間樂事令其心動太子復出城西門淨居天心念先現老病舉衆皆見令王嗔責我今現死惟令太子及優陀夷見耳卽化死人四人輦之室家大小號哭共送太子與優陀夷二人獨見太子問此爲何人優陀夷先受王敕默然不答如是三問淨居天威神之力不覺答言是死人也何謂爲死答曰死者刀風解形神識去矣四體諸根無復所知此人在世貪著五欲不識無常一旦捨之而死又爲父母親戚愛念命終之後恩情好惡不復

相關誠可哀也問惟此人死餘亦當然答曰一切世人皆應如是無有貴賤得免者太子曰世間乃復有此苦云何於中而行放逸又出北門到彼園所止息樹下除去侍衛端坐思惟時淨居天化作比丘法服持鉢手執錫杖視地徐行太子前問汝是何人答曰沙門何謂沙門答曰三界今擾擾六趣今昏昏識心達本源故名爲沙門又曰一切皆無常惟我所修聖道永得無爲到解脫岸言訖騰空而去太子喜曰天人之中惟此爲勝我當決定修學是道太子年十九自知出家時至詣王言曰父王恩愛集會必有別離

惟願聽我出家學道一切衆生愛別離苦皆使解脫
王流涕曰汝今宜息此意國未有嗣而便委我曾不
懷顧太子遂還時有相師白王太子今不出家過七
日已必得轉輪王位王卽往告太子我聞阿私陀說
汝必不樂處世惟願爲我生一子然後不復相違太
子答曰如勅卽以左手指其妃腹耶輸陀羅便覺有
娠二月七日淨居天人白太子曰無量劫來修行今
正成熟太子曰如汝等語但內外嚴衛欲去無從諸
天白言我等自設方便卽以神力悉令熟臥至於後
夜諸天克滿虛空同聲白言今者正是出家時太子

往至車匿所語之曰汝爲我牽犍陟來犍陟太子所
乘馬名車匿泣曰後夜之中欲何所之太子曰我今
欲爲一切衆生降伏煩惱汝不應違我車匿號哭欲
令王宮覺知以天神力昏臥如故於是諸天捧馬四
足并接車匿帝釋執蓋從北門出其門無聲自開太
子又曰我若不斷八苦終不還宮我若不得阿耨多
羅三藐三菩提不轉法輪終不還與父王相見我若
不盡恩愛之情終不還見波闍波提及耶輸陀羅行
至天曉已三繇旬諸天便沒不現太子至閑靜林卽
便下馬撫犍陟背而言所難爲事汝作已畢又語車

匿世人富貴競隨奉事我捨國來惟汝一人獨能隨
我甚爲希有我今既至汝與捷陟俱可還宮車匿悲
不自勝捷陟屈膝舐足淚落如雨太子卽就車匿取
七寶劍自剃鬚髮而發願言願其一切斷除煩惱及
諸習障淨居天又化獵師身服袈裟太子喜曰汝所
着衣是寂靜服我今以此寶衣與汝貿易吾服此衣
爲欲攝救一切衆生斷其煩惱答言善哉遂脫寶衣
質之太子前行車匿卽還太子入檀特山修道始於
阿羅邏迦藍處三年復至鬱頭藍弗處三年又至象
頭山於尼連河側靜坐思惟宜六年苦行以度衆生

天獻麻米淨心守戒或日一食或七日一食不避風
雨不起經行鵲巢糞汚亦不棄去

癸未釋迦牟尼佛示現成道

佛示六年苦行自念非正解脫我當受食而後成佛
卽沐浴於尼連河天爲偃樹挽之而出時彼林外有
二牧牛女一名難陀二名波羅見地中生千葉蓮花
上有乳糜取奉菩薩卽便受食復念過去諸佛以草
爲座成無上道帝釋因化凡人執淨軟草菩薩問汝
何名答名吉祥菩薩喜曰我破不吉以成吉祥卽便
受草向菩提樹下而取正覺菩薩坐闍浮樹下四十

撰述
佛正統卷之二
八日觀察思惟眉間白毫光蔽魔宮魔王波旬恐懼
召會諸魔及道未成當往亂之長子商主泣諫不聽
乃率衆作難悉現可怖可欲諸境時菩薩身心寂然
不動以指按地地大震魔聞怖懼還歸本宮乃於癸
未二月七日之夕入正三昧二月八日明星出時廓
然大悟成正等覺嘆曰奇哉一切衆生具有如來智
慧德相但以妄想執着不能證得

○釋迦牟尼佛示現說法

佛自二月八日成道九日至二十九日爲寂場智入
三世悉皆平等其身充滿一切世間其音普順十方

國土有無量無邊法身大士普賢文殊觀音彌勒等
及宿世根熟天龍八部一時圍繞如雲籠月爾時世
尊現毘盧遮那身說大方廣佛華嚴經三七日滿二
月三十日從菩提場座起詣波羅柰國行至阿闍波
羅水側日暮止宿入定風雨大至有大龍王名目真
隣陀以其大身七重圍繞龍有七頭羅覆佛上以爲
障蔽至三月六日四七日滿雨止出定龍王化作年
少婆羅門稽首問訊受三歸五戒諸旁生中最先見
佛三月七日受提謂長者食三月八日至鹿野苑初
世尊成道觀樹思惟一切衆生處五濁世三毒所覆

薄福鈍根無有智慧云何能解我所得法今我若轉法輪彼必不信生誹謗心當墮惡道受無量苦我寧不說入於涅槃時大梵天王心懷憂惱衆生長夜沉沒生死今當往請轉大法輪欲界六天亦同勸請世尊默然受之遂以五時設教第一華嚴時第二鹿苑時第三方等時第四般若時第五法華涅槃時世尊至鹿野苑憍陳如摩訶那摩跋波阿捨婆闍跋陀羅閣五人見佛心大歡喜求佛出家佛爲說法成阿羅漢於是世間始有三寶如來是佛寶四諦是法寶阿羅漢是僧寶有長者子名曰耶舍中夜睡覺見

諸妓女不淨生厭離心於不淨中生淨想忽見空中光明尋光而去趣鹿野苑佛爲說法成阿羅漢天明耶舍父爲尋子故跡至佛所佛受三歸爲最初優婆塞又耶舍朋類五十人共詣佛所俱成沙門迦毘羅國有婆羅門子名富樓那具解常陀等論與佛同日生本性厭離世間見佛出家卽與朋友三十人往雪山專心學道獲四禪五通以天眼遙見世尊在鹿野苑說法遂共三十人來到佛所求佛度脫說法人中最高第一南天竺有婆羅門姓大迦旃延第二子名那羅陀其父令習常陀諸論不久通解長兄忌

撰述
之欲害其命父令往阿私陀仙人處洞解諸論得四
禪五通仙人命終那羅陀貪世利養不信三寶有伊
羅鉢龍王商佉龍王爲夜叉金齊言彼城先有一偈
云在於何自在染着名爲染彼云何清淨云何得癡
名癡人何故迷云何名智人何會別離已名曰盡因
緣龍王至那羅陀仙所問此偈義不能解了那羅陀
乃詣佛佛爲開解說種種法生大歡喜遂求出家因
其種族本姓名大迦旃延論議第一 摩竭提國有
優樓頻螺迦葉兄弟三人學古仙道王臣歸信佛詣
彼住處現諸神通種種調伏先度優樓頻螺迦葉及

五百弟子又度那提迦葉迦闍迦葉各有二百五十
弟子俱證阿羅漢有一外甥螺髻梵志名優波斯那
在阿修羅山共二百五十弟子修學仙道亦投佛出
家成阿羅漢王舍城頻婆娑羅王見三迦葉爲佛弟
子嘆曰嗚呼如來有大神力智慧深遠不可思議乃
能伏如此之人以爲弟子佛爲說法得法眼淨王勅
諸臣於竹園起諸堂舍請佛及僧住彼竹園諸王見
佛頻婆娑羅爲首諸僧伽藍竹園爲始 王舍城有
二婆羅門具大智慧一名舍利弗一名目犍連各有
一百弟子往詣竹園佛爲說法成阿羅漢舍利弗智

撰述
佛藏經目卷二
七
慧第一目捷連神通第一 摩竭提國有婆羅門名
曰迦葉具大智慧誦四韋陀論日夜勤求無上道法
旋復出家修杜多行會空中有神告曰佛已出世請
往師之迦葉便趣竹園佛知其當來躬自往迎到多
子塔前相逢迦葉合掌言曰世尊實是一切種智實
是慈悲濟衆生實是一切所歸依卽五體投地而白
佛言世尊是我大師我是弟子如是三說佛言如是
迦葉我是汝師汝我弟子若人實非一切種智而欲
受汝爲弟子者頭裂爲七分復爲說法成阿羅漢以
此迦葉有大威德天人所重故名大迦葉 淨飯王

聞佛得道已經六年思欲一見令梵志優陀夷請佛
還國優陀夷見佛爲諸天釋梵歸化亦願爲沙門佛
爲說法得羅漢道卽遣優陀夷先現神變發起道心
於是神足飛行經遊虛空往到本國現十八變報言
却後七日佛當來降王出四十里迎佛見佛大喜選
宗族五百人爲沙門侍佛左右斛飯王二子一名摩
訶男一名阿那律摩訶男言諸釋多出家而我一門
獨無當一人營家一人出家那律以家事煩碎遂與
釋種跋提各白其母懇求出家過七日釋子等八人
出迦毘羅城脫其寶衣象馬付所使優波離令還優

波離思惟人身難得佛法難值諸尊貴者皆棄世榮
我身卑賤何所貪樂卽以寶衣等懸著樹上遂便共
至佛所白言我父母已許願聽出家乞先度優波離
以除我等憍慢心故於是世尊先度優波離次度那
律等 世尊從弟阿難以成道日生故名阿難此云歡喜

舉國欣慶又名慶喜八歲出家弟子中多聞第一年
三十一佛命給侍左右阿難言願如來與我三願一
者不受如來故衣二者不隨如來受別請三者聽我
出入無時佛言善哉具足智慧預見譏嫌何以故若
有人言汝爲衣食奉給如來是故不受故衣不隨別

請出入有時則不能廣利諸部故求出入無時我爲
阿難開是三事 佛子羅睺羅年已九歲佛遣目連
往迦毘羅城白父及耶輸陀羅放羅睺羅出家修習
聖道目連受命到彼以種種方便曉諭耶輸不聽時
佛起化人空中告言耶輸陀羅汝頗憶念往古世時
誓願事不我當爾時爲菩薩道以五百銀錢從汝買
得五莖蓮花上定光佛時汝求我世世所生共爲夫
妻我不欲受卽語汝言我爲菩薩累劫行願一切布
施不逆人意汝能爾者聽爲我妻汝立誓言世所
生國城妻子及與我身隨君施與誓無悔心而今何

故愛惜羅睺不令出家學聖道也耶輸聞已霍然還
識宿業因緣事事明了如昨所見愛子之情自然消
歇時淨飯王卽集團中豪族各遣一子有五十人隨
從出家佛使阿難剃頭舍利弗爲其和尚目連爲阿
闍梨授十戒法便爲沙彌 舍衛國王波斯匿有一
大臣名須達多家巨富賑貧乏時號給孤獨因欲爲
兒娶婦躬往王舍城中大臣護彌家旣到已見其家
內大張供具須達多問故答言請佛及僧問云何名
佛云何名僧護彌具告所以須達多聞之毛髮俱竦
尋到佛所見佛相好過於護彌所說心大歡喜佛爲

說法成須陀洹須達多願起精舍請佛降舍衛國度
彼衆生佛許之辭佛還家佛命舍利弗與俱至舍衛
國案行諸地惟王太子祇陀有園正得處所須達多
乃白太子太子不肯須達多慙懃再三太子曰若能
以黃金布地令無空者便當相與答曰諾乃使人象
負黃金八十頃中須臾欲滿畧欠少地太子念言佛
必大德能使斯人輕寶乃爾遂令止勿更出金園地
屬卿樹木屬我共立精舍須達多共舍利弗經地已
竟起立精舍啓知國王請佛及僧佛言須達買園樹
木祇陀所有可名祇樹給孤獨園 佛再還迦毘羅

衛國王問云何修行當得諸佛之道佛言一切衆生皆卽是佛父王當念西方世界阿彌陀佛常勤精進當得佛道王言一切衆生云何是佛佛言一切法無生無動搖無取捨無相貌無自性王當於此佛法中安住其心勿信於他王與七萬釋種聞說是法信解歡喜悟無生忍 初佛還國姨母大愛道波提白佛出家三請不許及佛再還國如前重請佛亦不許佛旣出國大愛道與諸老母等追佛頓止河上復求出家又亦不許不住門外獻歎而啼阿難自外回問故答曰我以女人故不得出家自悲傷耳阿難乃白

佛大愛道以至心欲受法律願佛聽之佛言止止若聽女人出家者令正法不得久住阿難復曰過去諸佛具四部衆如來獨不具耶佛言若大愛道修八敬法盡壽行之可入法律阿難出告大愛道便受大戒爲比丘尼遂得應真 樓至菩薩請立戒壇爲比丘結戒受戒於是創立三壇佛院門東名佛爲比丘結戒壇佛院門西佛爲比丘尼結戒壇外院東門南置僧爲比丘受戒壇戒壇從地而立三重爲相以表三空爲入佛法初門時天帝施以覆釜置於壇上大梵王施無價寶珠置覆釜上供養舍利是爲五重表立

分法身壇時十方諸佛無量菩薩天龍八部悉皆雲集諸佛登之共議結戒輕重持犯等相及度尼滅正法相諸佛通議曰古有四部今何獨無初雖正法滅半今尼行八敬還住千年故此二壇惟佛所登共量佛事外院戒壇乃僧為四眾受戒壇也

佛祖綱目卷第二 終

華亭居士王元端施刻此卷

青蓮居士對

會稽馬存預書男之梅刻
崇禎壬申孟夏

佛祖綱目卷第三

玄字號

甲子

周穆王四十五年
起

乙亥

共王元年

丁亥

懿王元年

壬子

孝王元年

癸亥

周孝王十二年止

佛滅時此方暴風忽起損舍折樹地動木陰西方有白虹十二道南北通貫連夜不滅穆王怪問群臣太史扈多對曰西方聖人入滅之相耳

辛未釋迦牟尼佛傳法大迦葉

佛說法華經凡二處三會始在靈山次升虛空後復還靈山有大梵王以金色波羅花獻佛請佛說法世尊登座拈花示眾人天百萬悉皆罔措獨有迦葉破

顏微笑世尊曰我有正法眼藏涅槃妙心實相無相
微妙法門付囑與汝汝當護持流通母令斷絕聽吾
偈曰法本法無法無法法亦法今付無法時法法何
曾法說偈已復告迦葉吾將金縷僧伽黎衣傳付與
汝轉授補處慈氏勿令朽壞并敕阿難副貳傳化迦
葉禮足白佛言善哉善哉我當依勅恭順佛故

壬釋迦牟尼佛示現涅槃

辛未十一月既望佛念四衆懈怠不將侍者如屈伸
臂頃獨至忉利天歡喜園三月安居佛告文殊汝諸
母所道我在此摩耶既至佛言身所經歷與苦樂俱

當修涅槃永離苦樂摩耶聞法得須陀洹果是時人
間久不見佛優填王等至阿難所問佛所在阿難報
曰我亦不知時優填王渴仰如來遂勅奇巧工匠作
如來形像毘首羯磨天化身爲匠不日而成三月將
盡佛令鳩摩羅告闍浮提如來將下欲入涅槃於是
佛化寶階從天而下優填王載像來迎爲佛作禮佛
三喚三應乃云無爲真佛實在我身又語像言汝於
來世大作佛事 佛姨母大愛道將欲滅度告衆曰
吾不忍見世尊泥洹遂與五百比丘尼白佛佛默可
之乃愛道便還精舍各現神足同時滅度 舍利弗

目健連不忍見佛泥洹遂先入滅七萬阿羅漢亦同時入滅四衆惶亂佛以神力化二弟子在佛左右四衆稍定 壬申二月十五日佛在拘尸那城力士生地跋提河邊娑羅雙樹間臨涅槃時說涅槃經告大衆言我以甚深般若遍觀三界根本性離畢竟寂滅同虛空相一無所有法相如是其知是者名出世人 是事不知名生死始時諸比丘勸請如來惟願久住不入涅槃佛言汝等不應作如是語我今所有無上正法悉已付囑摩訶迦葉是迦葉者當爲汝等作大依止猶如如來復告文殊阿難給侍我來二十餘年

聞法受持如瀉水置器我今欲令受持是涅槃經爲諸魔所惱汝可持是大陀羅尼救護阿難文殊受已至阿難所魔王聞呪卽放阿難歸至佛所佛於是三入禪定三出三告乃云以是因緣我今安住常寂滅光名大涅槃於寶床右脇而臥於其中夜寂然無聲便般涅槃迦葉遠來奔訃金棺自開卽現雙足出於棺外衆禮足已還自入棺爾時棺從座舉高七多羅樹往返空中化火三昧須臾灰生得舍利八斛四分諸王爭取有婆羅門以石瓶塗蜜卽其三分一分諸天一分龍王一分八國 天上四塔忉利城東照

撰述
佛國經卷之三
明園佛髮塔城南龕澁園佛衣塔城西歡喜園佛鉢
塔城北駕御園佛牙塔人中四塔生處塔在迦毘羅
衛國林微園中成道塔在摩竭提國元吉樹下轉法
輪塔在波羅柰國鹿野苑中涅槃塔在拘夷那竭國
力士生地秀林雙樹間

○阿難尊者結集三藏

佛滅度後諸天王等請迦葉言法城欲頽法幢欲倒
當以大悲建立佛法迦葉受請往須彌頂擊大捷槌
諸聖弟子得神通者皆來集會迦葉告言佛法欲滅
衆生可愍待結集竟隨汝入滅諸來聖衆受教而住

畢鉢羅窟迦葉以天眼觀惟有阿難煩惱未盡遂於
大衆中牽出阿難言汝結未盡不應住此阿難悲泣
告迦葉言我能有力久可得道但爲侍佛以阿羅漢
者不能給侍故畱殘結不盡斷爾迦葉復告阿難汝
有六種罪應於僧中悔過是時阿難長跪合掌依六
種罪懺悔懺悔已迦葉牽阿難出語言汝漏盡可來
言訖身閉窟門阿難涕淚悲泣求斷結惑靡不精誠
至於後夜疲極偃息頭未至枕朗然得悟三明六通
作大阿羅漢却至窟擊門曰我漏已盡迦葉言汝若
漏盡可縱神通於戶鑰孔中入阿難騰身入來禮拜

僧足迦葉手摩阿難頂而告之言我欲爲汝令汝得道汝勿嫌恨時大衆請阿難陞座結集法藏阿難既陞座已未發言間感得自身相好如佛是時大衆疑佛重起或疑他方佛來或疑阿難成佛及發聲唱言如是我聞一時佛住某處與某衆俱三疑俱遣

○釋迦牟尼佛機緣

世尊初生時一手指天一手指地周行七步目顧四方曰天上天下惟我獨尊 世尊一日陞座大衆集定文殊白椎曰諦觀法王法法王法如是世尊便下座 世尊一日陞座默然而坐阿難白椎曰請世尊

說法世尊云會中有二比丘犯律行故我不說法阿難以他心通觀是比丘遂乃遣出世尊還復默然阿難又白適來爲二比丘犯律是二比丘已遣出世尊何不說法世尊云吾誓不爲二乘聲聞人說法便下座 世尊一日陞座迦葉白椎曰世尊說法竟便下座 世尊示隨色摩尼珠問五方天王此珠作何色時五方天王互說異色世尊藏珠復擡手曰此珠作何色天王曰佛手中無珠何處有色世尊曰汝何迷倒之甚吾將世珠示之便強說有青黃赤白色吾將真珠示之便總不知時五方天王悉自悟道 世尊

因黑氏梵志獻合歡梧桐花佛召仙人放下著梵志放下左手一株花佛又召仙人放下著梵志又放下右手一株花佛又召仙人放下著梵志曰吾今兩手俱空更教放下箇甚麼佛曰吾非教汝放捨其花汝當放捨外六塵內六根中六識一時捨却無可捨處是汝放身命處梵志於言下悟無生忍世尊因普眼菩薩欲見普賢不可得見乃至三度入定徧觀三千大千世界覓普賢不可得見而來白佛佛曰汝但靜三昧中起一念便見普賢於是普眼纔起一念便見普賢向空中乘六牙白象五通仙人問世尊有

六通我有五通如何是那一通佛召五通仙人仙人應諾佛曰那一通你問我世尊一日勅阿難食時將至汝當入城持鉢阿難應諾世尊曰汝旣持鉢須依過去七佛儀式阿難便問如何是七佛儀式世尊召阿難阿難應諾世尊曰持鉢去世尊因比丘問我於世尊法中見處卽有證處未是世尊當何所示世尊曰比丘某甲當何所示是汝此問世尊因者婆善別音響至一塚間見五髑髏乃敲一髑髏問者婆此生何處曰此生人道又敲一曰此生何處曰此生天道又別敲一問者婆此生何處者婆罔知生處

世尊因七賢女遊尸陀林一女指屍曰尸在這裏人在甚處去一女曰作麼作麼諸姊諦觀各各契悟感帝釋散花曰惟願聖姊有何所須我當終身供給女曰我家四事七珍悉具足惟要三般物一要無根樹子一株二要無陰陽地一片三要叫不響山谷一所帝釋曰一切所須我悉有之若三般物我實無有女曰汝若無此爭解濟人帝釋罔措遂同往白佛佛曰僑尸迦我諸弟子大阿羅漢不解此義惟有諸大菩薩乃解此義世尊因地布髮掩泥獻花於然燈佛然燈見布髮處遂約退衆乃指地曰此一方地宜

建一梵剎時衆中有一賢于長者持標於指處掃曰建梵剎竟時諸天散花相讚世尊嘗與阿難行次見一古佛塔世尊便作禮阿難曰此是甚麼人塔世尊曰過去諸佛塔阿難曰過去諸佛是甚麼人弟子世尊曰是吾弟子阿難曰應當如是世尊因自恣日文殊三處過夏迦葉欲白椎擯出纔拈椎乃見百千萬億文殊迦葉盡其神力椎不能舉世尊遂問迦葉汝擬擯那箇文殊迦葉無對城東有一老母與佛同生不欲見佛每見佛來即便迴避雖然如此回顧東西總皆是佛遂以手掩面乃至十指掌中總皆

是佛 世尊因文殊至諸佛集處值諸佛各還本處
惟有一女人近於佛座而入三昧文殊乃白佛云何
此人得近佛而我不得佛告文殊汝但覺此女令從
三昧起汝自問之文殊繞女人三匝鳴指一下乃托
至梵天盡其神力而不能出世尊曰假使百千文殊
亦出此女人定不得下方過四十二恒河沙國土有
罔明菩薩能出此女人定須臾罔明大士從地湧出
作禮世尊世尊勅罔明出罔明却至女子前鳴指一
下女子於是從定而出 殃崛摩羅因持鉢至一長
者門其家婦人正值產難長者曰瞿曇弟子汝爲至

聖當有何法能免產難殃崛語長者曰我乍入道不
知此法待我回問世尊却來相報及返具事白佛佛
告殃崛汝速去報言我從賢聖法來未曾殺生殃崛
奉佛語疾往告之其婦得聞當時分娩 世尊一日
因文殊在門外立乃曰文殊文殊何不入門來文殊
曰我不見一法在門外何以教我入門 無邊身菩
薩將竹杖量世尊頂丈六了又丈六量到梵天不見
世尊頂乃擲下竹杖合掌說偈云虛空無有邊佛功
德亦然若有能量者窮劫不可盡 世尊因乾闥婆
王獻樂其時山河大地皆作琴聲迦葉起作舞王問

迦葉豈不是阿羅漢諸漏已盡何更有餘習佛曰實無餘習莫謗法也王又撫琴三徧迦葉亦三度作舞王曰迦葉作舞豈不是習佛曰實不曾作舞王曰世尊何得妄語佛曰不妄語汝撫琴山河大地木石盡作琴聲豈不是王曰是佛曰迦葉亦復如是所以實不曾作舞王乃信受世尊在第六天說大集經勅他方此土人間天上一切猙惡鬼神悉皆輯會受佛付囑擁護正法設有不赴者四天門王飛熱鐵輪追之令集既集會已無有不順佛勅者各發弘誓擁護正法惟有一魔王謂世尊曰瞿曇我待一切衆生成

佛盡衆生界空無有衆生名字我乃發菩提心世尊因調達謗佛生身入地獄遂令阿難問你在地獄中安否曰我雖在地獄如三禪天樂佛又令問你還求出否曰我待世尊來便出阿難曰佛是三界導師豈有人地獄分調達曰佛既無入地獄分我豈有出地獄分世尊因文殊忽起法見佛見被世尊威神攝回二鐵圍山世尊因靈山會上五百比丘得四禪定具五神通未得法忍以宿命智通各自見殺父害母及諸重罪於自心內各各懷疑於甚深法不能證入於是文殊承佛神力遂手握利劍持逼如來

世尊乃謂文殊曰住住不應作逆勿得害吾吾必被害爲善被害文殊師利爾從本已來無有我人但以內心見有我人內心起時我必被害卽名爲害於是五百比丘自悟本心如夢如幻於夢幻中無有我人乃至能生所生父母於是五百比丘同讚嘆曰文殊大智士深達法源底自手握利劍持逼如來身如劍佛亦爾一相無有二無相無所生是中云何殺世尊因外道問不問有言不問無言世尊良久外道嘆曰世尊大慈大悲開我迷雲令我得人作禮而去阿難白佛外道得何道理稱讚而去世尊曰如世良馬

見鞭影而行世尊因波斯匿王問勝義諦中有世俗諦否若言無智不應二若言有智不應一一二之義其義云何佛言大王汝於過去龍光佛時曾問此義我今無說汝今無聽無說無聽是爲一義二義世尊因外道問昨日說何法世尊曰說定法外道曰今日說何法曰不定法外道曰昨日說定法今日何說不定法世尊曰昨日定今日不定世尊因有異學問諸法是常耶世尊不對又問諸法は無常耶世尊亦不對異學曰世尊具一切智何不對我世尊曰汝之所問皆爲戲論世尊嘗在尼俱律樹下坐次

因二商人問世尊還見車過否曰不見還聞否曰不聞莫禪定否曰不禪定莫睡眠否曰不睡眠商人乃嘆曰善哉善哉世尊乃覺而不見世尊因長爪梵志索論義預約曰我義若墮當斬首以謝世尊曰汝義以何爲宗志曰我以一切不受爲宗世尊曰是見受否志拂袖而去行至中路有省乃嘆曰我義兩處負墮是見若受負門處籠是見不受負門處細一切人天二乘不知我義墮處惟有世尊諸大菩薩知我義墮回至世尊前曰我義兩處負墮故當斬首以謝世尊曰我法中無如是事汝當回心向道於是同五

百徒衆一時投佛出家證阿羅漢世尊一日坐次見二人昇猪過乃問這箇是甚麼曰佛具一切智猪子也不識世尊曰也須問過世尊臨入涅槃文殊大士請佛再轉法輪世尊咄曰文殊吾四十九年住世未曾說一字汝請吾再轉法輪是吾曾轉法輪耶世尊於涅槃會上以手摩胸告衆曰汝等善觀吾紫磨金色之身瞻仰取足勿令後悔若謂吾滅度非吾弟子若謂吾不滅度亦非吾弟子世尊至拘尸那城告諸大衆吾今背痛欲入涅槃卽往娑羅雙樹下泊然示寂復從棺起爲母說法并說無常偈曰諸

撰述
行無常是生滅法生滅滅已寂滅爲樂時諸弟子卽以香薪競茶毘之燼後金棺如故大衆卽於佛前以偈讚曰凡俗諸猛熾何能致火熱請尊三昧火闍維金色身時金棺從座而舉高七多羅樹往返空中化火三昧須臾灰生得舍利八斛四斗

○諸菩薩羅漢機緣

文殊菩薩一日令善財採藥曰不是藥者採將來善財徧觀大地無不是藥却來白曰無不是藥者殊曰是藥者採將來善財遂於地上拈一莖草度與文殊殊接得示衆曰此藥亦能殺人亦能活人 文殊問

菴提遮女曰生以何爲義女曰生以不生生爲生義曰如何是生以不生生爲生義女曰若能明知地水火風四緣未嘗自得有所和合而能隨其所宜是爲生義曰死以何爲義女曰死以不死死爲死義曰如何是死以不死死爲死義女曰若能明知地水火風四緣未嘗自得有所離散而能隨其所宜是爲死義菴提遮女問文殊曰明知生是不生之理爲何却被生死之所流轉殊曰其力未克 文殊嘗謂善住意天子曰汝今若能違背諸佛毀謗法僧吾卽將同汝如是梵行天子曰大士今何故復如是語殊曰天

子如汝意者以何爲佛天子曰如如法界我言是佛
殊曰天子於汝意云何如如法界可染著乎曰弗也
殊曰以是義故我如是說汝今若能背毀佛法僧吾
將同汝如是梵行 善住天子白文殊可共俱往如
來之所咨受未聞亦同此時如法問難殊曰爾莫分
別取著如來天子曰如來今在何所令我莫著殊曰
祇在目前天子曰若如是者我何不見殊曰爾若一
切不見是名真見如來天子曰若見在前云何戒我
莫取著如來殊曰爾今見前何有天子曰有虛空界
殊曰如來者虛空界是故虛空界者卽是如來此中

無有一物可分別者 維摩會上三十二菩薩各說
不二法門文殊曰我於一切法無言無說無示無識
離諸問答是爲菩薩入不二法門於是文殊又問維
摩仁者當說何等是菩薩入不二法門維摩默然文
殊讚曰乃至無有語言文字是菩薩真入不二法門
善財參五十三員善知識末後到彌勒閣前見樓
閣門閉瞻仰讚歎見彌勒從別處來善財作禮曰願
樓閣門開令我得入彌勒尋至善財前彈指一聲樓
閣門開善財已入閣門卽閉見百千萬億樓閣一一
樓閣有一彌勒領諸眷屬并一善財而立其前 須

菩提尊者在巖中宴坐諸天雨花讚嘆者曰空中雨花讚嘆復是何人云何讚嘆天曰我是梵天敬重尊者善說般若者曰我於般若未嘗說一字云何讚嘆天曰如是尊者無說我乃無聞無說無聞是真說般若須菩提一日說法天帝釋雨花提問此花從天得耶從地得耶從人得耶釋曰弗也提曰從何得耶釋乃舉手提曰如是如是無厭足王入大寂定乃勅有情無情皆順於王若有一物不順於王卽入大寂定不得舍利弗因入城遙見月上女出城舍利弗心口思惟此姊見佛否知得恐不得恐否我當問

之纔近便問大姊往甚麼處去女曰如舍利弗與麼去弗曰我方入城汝方出城何言如我恁麼去女曰諸佛弟子當依何住弗曰諸佛弟子依大涅槃而住女曰諸佛弟子既依大涅槃而住我亦如舍利弗與麼去舍利弗問須菩提夢中說六波羅蜜與覺時同異提曰此義深遠吾不能說會中有彌勒大士汝往彼問舍利弗問彌勒彌勒曰誰是彌勒誰名彌勒舍利弗問天女曰何以不轉女身女曰我從十二年來求女人相了不可得當何所轉卽時天女以神通力變舍利弗令如天女女自化身如舍利弗乃問

言何以不轉女身舍利弗以天女像而答言我今不知云何轉面而變爲女身 鶯崛魔羅尊者未出家時外道受教爲僑尸迦欲登王位用千人拊指爲花冠已得九百九十九惟欠一指遂欲殺母取指時佛在靈山以天眼觀之乃作沙門在鶯崛前鶯崛遂釋母欲殺佛徐行鶯崛急行追之不及乃喚曰瞿曇住住佛告曰我住久矣是汝不住鶯崛聞之心忽開悟遂棄办投佛出家 障蔽魔王領諸眷屬一千年隨金剛齊菩薩覓起處不得忽一日得見乃問曰汝當依何而住我一千年覓汝起處不得齊曰我不依

有住而住不依無住而住如是而住 那叱太子析骨還父析肉還母然後現本身運大神力爲父母說法 廣額屠兒於涅槃會上放下屠刀立地成佛自云是賢劫千佛一數

丙辰初祖大迦葉傳法阿難

摩訶迦葉摩竭陀國人姓婆羅門父號飲澤母號香至過去世爲鍛金師善明金性使其柔伏嘗於久遠劫中毘婆尸佛入涅槃後四衆起塔塔中像面上金色有少缺壞時有貧女將金珠往金師所請飾佛面旣而因共發願願我二人世世爲無姻夫妻繇是因

緣九十一劫身皆金色及此世與紫金光尼復爲夫
婦梵語迦葉波此云飲光勝尊蓋以金色爲號然夫
婦皆清淨自居無世間想旋復出家冀度諸有佛於
衆中稱嘆第一後因拈花因緣付法有外道問如何
是我我迦葉曰覓我者是汝我外道曰這箇是我我
師我何在迦葉曰汝問我覓一日踏泥次有一沙彌
問尊者何得自爲迦葉曰我若不爲誰爲我爲佛涅
槃時迦葉告衆曰佛已茶毘金剛舍利非吾等事宜
結集法藏無令斷絕結集旣畢迦葉自念衰老宜入
定於雞足山以待彌勒乃召阿難言我今不久世間

今將正法付囑於汝汝當護持聽吾偈曰法法本來
法無法無非法何於一法中有法有不法偈已阿難
作禮奉命迦葉念如來舍利皆在諸天凌虛徧至塔
摩禮已而還復以夙約往辭阿闍世王遂杳然入雞
足山席草而坐自念今我被糞掃服持僧伽黎必經
五十七俱胝六十万千歲至於彌勒出世終不致壞
乃語山曰若阿闍世王及阿難來汝當爲開去已復
合阿闍世王知迦葉已入雞足山乃請阿難同往山
果爲開見迦葉入定儼然王禮拜訖欲以香薪茶毘
阿難曰未可燔也大迦葉方以禪定持身俟慈氏下

生乃般涅槃王聞驚嘆與阿難禮辭山合如故當此
土周孝王五年丙辰也

佛祖綱目卷第三 終

華亭居士王元瑞施刻此卷 青蓮居士對
會稽馬存預書男之柏刻
崇禎壬申孟夏

佛祖綱目卷第四 黃字號

甲子 周孝王十三年起 丁卯 夷王元年 癸未 厲王元年 庚申 周共和元年

癸亥 周共和四年止

癸巳 二祖阿難傳法商那和修

阿難王舍城人姓刹帝利父斛飮王實佛之從弟也
多聞博達智慧無礙世尊以為總持第一嘗所讚歎
加以宿世有大功德受持法藏如水傳器乃命為侍
者一日白佛言今日入城見一奇特事佛曰見何奇
特事阿難曰入城見一攢樂人作舞出城總見無常
佛曰我昨日入城亦見一奇特事阿難曰未審見何

奇特事佛曰我入城時見一攢樂人作舞出城時亦見樂人作舞阿難一日問迦葉曰師兄世尊傳金縷袈裟外別傳箇甚麼迦葉召阿難阿難應諾迦葉曰倒却門前刹竿着阿難一日入竹林聞比丘誦偈曰若人生百歲不見水老鶴不如生一日而得覩見之阿難因爲正之曰不然佛云若人生百歲不解諸佛機不如生一日而得解了之於是比丘以聞其師其師曰阿難老昏矣吾語是也異日阿難復經竹林見比丘誦偈如前阿難詰知其故因念愚癡難化入三昧求尊聖爲之證於是地爲之動光明遠發俄有一

聖宿大士示現而爲之說偈曰彼者念諷偈實非諸佛意今遇歡喜尊而可依了之彼師弟子竦敬尋得二果後阿闍世王自言如來迦葉尊勝二師皆已涅槃而我多故悉不能覩仁者般涅槃時願垂告別阿難許之後自念言我身危脆猶如聚沫况復衰老豈堪長久又念阿闍世王與吾有約乃詣王宮告之曰吾欲入涅槃故來辭耳門者曰王寢不可以聞阿難曰侯王覺時當爲我說時王夢中見一寶蓋七寶嚴飾千萬億衆圍繞瞻仰俄而風雨暴至吹折其柄珍寶瓔珞悉墜於地心甚驚異既寤門者具白上事王

聞語已失聲號慟哀感天地卽至毘舍離城見阿難在恒河中流踟躕而坐王乃作禮而說偈言稽首三界尊棄我而至此暫憑悲願力且莫般涅槃時毘舍離王亦在河側復說偈言尊者一何速而歸寂滅場願住須臾間而受於供養爾時阿難見二國王咸來勸請乃說偈言二王善嚴住勿爲苦悲戀涅槃當我淨而無諸有故復念我若同一國而般涅槃諸國爭競無有是處應以平等度諸有情遂於恒河中流將入寂滅是時山河大地六種震動雪山中有五百仙人覩茲瑞應飛空而至禮阿難足胡跪白言我當於

長老而證佛法願垂大慈度脫我等阿難默然受請卽變宛伽河悉爲金地爲其仙衆說諸大法復念先所度脫弟子應當來集須臾五百羅漢從空而下爲諸仙人出家受具其仙衆中有二羅漢一名商那和修二名末田地迦阿難知是法器乃告之曰如來以正法眼付大迦葉迦葉入定而付於我我今將滅復付於汝汝受吾教當聽偈言本來付有法付了言無法各各須自悟悟了無無法說偈已復以正法眼囑累商那和修而謂末田地迦曰昔佛記云佛滅度後後五百歲中汝當於罽賓國敷宣大法言已躡身虛

空現十八變入風輪奮迅三昧而分身四分一分惠
切利天一分惠娑竭羅龍宮一分惠阿闍世王一分
惠毘舍離王各造寶塔而供養之當此土周厲王十
二年癸巳也

佛祖綱目卷第四 終

華亭居士王元瑞施刻此卷 青蓮居士對
會稽馬存預書男之梅刻
崇禎壬申孟夏

佛祖綱目卷第五 字字號

甲子 周共和五年起 甲戌 宣王元年 庚申 幽王元年 癸亥 周幽王四年止

乙未 三祖商那和修傳法優波邠多

商那和修摩突羅國人亦名舍那婆斯姓毘舍多父
林勝母憍奢耶在胎六年而生西域有九枝秀草名
商諾迦 此云自然服 出則聖人降生和修生而此草出昔
如來行化至摩突羅國見一青林枝葉茂盛語阿難
曰此林地名優留荼吾滅後一百年有比丘名商那
和修於此轉妙法輪後百歲果誕和修出家證道受
慶喜尊者法眼化導有情及至此林降二火龍龍受

三歸遂施其地以建梵宮和修化緣既久思付正法
尋於叱利國得優波毘多以為給侍因問毘多曰汝
年幾耶答曰我年十七和修曰汝身十七性十七耶
答曰師髮已白為髮白耶心白耶和修曰我但髮白
非心白耳毘多曰我身十七非性十七也和修知是
法器後三載遂為落髮受具告曰昔如來以無上正
法眼藏付囑迦葉展轉相授而至於我我今付汝勿
令斷絕汝受吾教聽吾偈曰非法亦非心無心亦無
法說是心法時是法非心法說偈已即隱於罽賓國
南象白山中後於三昧中見毘多有五百徒眾常多

懈慢乃往彼正之毘多見和修至頂禮次和修以右
手上指即有香乳自空而注問毘多曰汝識之乎毘
多不測遂入三昧觀察亦不能測乃請曰是果何三
昧耶和修曰是謂龍奮迅三昧如是五百三昧汝皆
未之知復曰如來三昧辟支不識辟支三昧阿羅漢
不識吾師阿難三昧而我不識今我三昧汝豈識乎
是三昧者心不生滅住大慈力遙相恭敬其至此者
乃可識之於是毘多弟子皆伏而悔謝和修復為說
偈曰通達非彼此至聖無長短汝除輕慢意疾得阿
羅漢五百比丘聞偈已依教奉行皆獲無漏和修乃

現十八變化火光三昧用焚其身龜多收舍利建塔於梵迦羅山當此土周宣王二十二年乙未歲也

○阿育王造塔緣起

巴連弗邑國王名頻頭婆羅生子阿育此云無憂身體龐濕不喜見之後值邊國恒又尸羅反諸子中獨命阿育往伐僅給朽鈍甲兵數十人從者難之阿育曰我若應王自有來應之者作是語時忽然兵甲從地湧出卽將往伐彼國俱聞空中宣示阿育王子當王此天下汝等勿興逆意於是諸國悉平至於海際適王臥病諸臣共扶阿育將至王所欲立爲王王聞不樂

卽便命終阿育心念我若應王諸天自然水灌我頂素縉繫首言訖鐵輪飛降王闍浮提領一天下阿育王如法葬父王已卽立阿菟樓陀爲大臣時諸臣自恃策立功高心生輕慢王知其意乃勅諸臣伐花果之樹而植刺棘三勅不從卽持利劍手殺諸臣阿菟樓陀勸王宜立屠殺之人時有克惡耆黎子自誇其能王便爲起屋舍僅開一門中作種種治罪之法狀似地獄克人啓王若入此中者不復得出王許之爾時有一商主之子厭世間苦出家學道遊行諸國次第乞食誤入屠舍遙見舍中火車爐炭等恐怖毛豎

便欲出門。覓主前來執捉比丘。比丘心生悲悔涕淚滿目。乞延一月不聽。如是漸減。至於七日。乃聽比丘勇猛精進。坐禪息心。至第七日。適王將一宮女。送付覓主。覓主取著白中杵。擣須臾。便成碎末。比丘見已極生厭惡。我身不久亦當如是。斷一切結。成阿羅漢。覓主語比丘。言期限已盡。比丘答曰。我心得解脫。斷除諸有。盡今此身。骸無復恡惜。覓主卽執比丘。著鐵鑊。油中。使者燃火。火不能熱。及至自燃。火卽猛盛。旣開鑊蓋。見比丘坐蓮華上。生希有心。卽以啓王。王便嚴駕。率衆來看比丘。身升虛空。猶如鴈王。示種種

變化。向王說。偈曰。我是佛弟子。逮諸漏已盡。生死大恐怖。我今悉得脫。阿育王聞已。於佛法所生大敬信。白比丘言。佛未滅度時。何所記說。答曰。佛記大王於我滅後。過百歲時。於巴連弗邑。有三億家。彼國有王名曰阿育。當王此闍浮提。爲轉輪王。正法治化。又復宣布。我舍利於闍浮提。立八萬四千塔。王今造此大地獄。殺害無量。宜應承佛所記。如法修行。阿育王合掌作禮。我得大罪。惟願佛子。受我懺悔。勿復責我。愚人比丘。度阿育王已。乘空而化。時王欲出覓主。留之王曰。汝欲殺我耶。答曰。如是。王曰。誰先入此中。答曰。

我是王曰若然者汝先應取死卽勅左右將庖主著膠舍中以火燒之又勅壞此地獄施衆生無畏王乃至王舍城取佛塔中舍利作八萬四千金銀瑠璃頗黎篋又作八萬四千四寶瓶勅諸鬼神造八萬四千塔耶舍尊者舒指放光八萬四千道令捷疾鬼於閻浮提城邑聚落滿一億家者各立一塔在震旦國者一十九所 初世尊與諸比丘循邑而行時有二童子一名闍耶二名毘闍耶共在沙中嬉戲遙見世尊三十二相莊嚴其體闍耶心念我當以麥麩上佛仍手捧細沙著世尊鉢中毘闍耶亦合掌隨喜時童子

發願言以惠施善根功德令得一天下一繖蓋王卽於此處生得供養諸佛世尊微笑告阿難曰我滅度百年之後此童子於巴連弗邑統領一天下轉輪王姓孔雀名阿育正法治化又復廣布我舍利造八萬四千塔阿難汝可取此鉢中所施之沙捨著如來經行處阿難如教奉行

○阿育王參禮優波鞠多

時巴連弗邑有上座名耶舍阿育王深生禮敬立雞雀精舍請耶舍主之至是復詣雞雀白耶舍曰更有比丘佛所授記當作佛事否我當往請供養恭敬耶

舍答曰佛般涅槃時游行至摩偷羅國告阿難曰於我般涅槃百歲之後當有長者子名優波鞠多出家學道號無相佛王曰今已出世不答曰已出世住在優留茶山中王聞已便欲詣彼令使者告報鞠多思惟若王來者無量侍從殺害微蟲答使者曰我當自詣王所鞠多遂至王國王大歡喜至尊者前五體投地長跪合掌而言曰我今領此閻浮提受輪王位不以爲喜今覩尊者如覩於佛踴躍無量如來弟子乃能如是又曰尊者顏貌端正而我形體醜陋何也鞠多說偈曰我行布施時淨心好財物不如王布施以

沙施於佛王又自言願尊者示我佛所說法遊行處并佛記諸大弟子塔所當禮拜供養鞠多曰善哉善哉遂將王至彼所一一指示供養訖至示阿難塔曰此人是佛侍者多聞第一撰集佛經王遂捨百億珍寶供養是塔告諸臣曰如來之體身法身性清淨彼悉能奉持是故供養勝法燈常存世滅此愚癡冥皆繇從彼來是故供養勝王復詣菩提樹下手持香爐向四方作禮願如來賢聖弟子在諸方者悉來集會時三萬大阿羅漢王見第一座無人問其故海意尊者曰此是寶頭盧位此人親見佛來王曰今在何

處海意曰且待須臾言訖賓頭盧從空而下王請就座禮敬賓頭盧不顧王乃問承聞尊者親見佛來是否賓頭盧以手策起眉曰會麼王曰不會曰阿耨達池龍王會請佛齋吾是時亦預其數

佛祖綱目卷第五終

華亭居士王元瑞施刻此卷 青蓮居士對會稽馬存預書 上元業應儒刻 崇禎壬申孟夏



佛祖綱目卷第六 宙字號

甲子 周幽王五年起 辛未 平王元年 壬戌 桓王元年 癸亥 周桓王二年止

庚子 四祖優波叟多傳法提多迦

優波叟多叱利國人 一名優波囉多 一名鄢波叟多 姓首陀父善意

十七出家二十證果隨方行化至摩突羅國得度者甚衆繇是魔宮震動波旬愁怖遂竭其魔力以害正法叟多即入三昧觀其所繇波旬復伺便密持瓔珞摩叟多頸及叟多出定取人狗蛇三屍化為華鬘輒言諭波旬曰汝與我瓔珞甚是珍妙吾此華鬘以相酬奉波旬大喜引頸受之即變為三種臭屍蟲蛆壞

爛波旬厭惡大生憂惱盡其神力莫能移動乃升六欲天告諸天主又詣梵王求其解免彼各告言十力弟子所作神變我輩凡陋何能去之波旬曰然則柰何梵王曰汝可歸心尊者卽能除斷乃爲說偈令其回向曰若因地倒還因地起離地求起終無其理波旬受教已卽下天宮至叢多所禮足哀懺叢多曰汝自今去於如來正法更作燒害否波旬曰我誓回向佛道永斷不善叢多曰若然者汝可口自唱言皈依三寶波旬合掌三唱華鬘悉除乃歡喜踴躍而說偈曰稽首三界尊十力聖弟子我今願回向勿令有劣

弱說是偈已作禮而去叢多一日因訪一老比丘尼纔入門便觸撒鉢孟比丘尼曰佛在日六群比丘甚是麤行數來我舍尚不如是尊者紹祖位人得與麼麤行叢多乃休去叢多在世化導證果最多每度一人以一籌置於石室其室縱十八肘廣十二肘克滿其間最後有一長者子名曰香衆來禮叢多求出家叢多問曰汝身出家心出家答曰我來出家非爲身心叢多曰不爲身心復誰出家答曰夫出家者無我我故無我我故卽心不生滅心不生滅卽是常道諸佛亦常心無形相其體亦然叢多曰汝當大悟心自

撰述
通達宜依佛法僧紹隆聖種卽爲剃髮授具足戒仍告之曰汝父嘗夢金日而生汝可名提多迦復謂曰如來以大法眼藏次第傳授以至於我今復付汝聽吾偈曰心自本來心本心非有法有法有本心非心非本法付法已乃躡身虛空呈十八變却復本座跏趺而逝時號無相好佛提多迦以室內籌用焚其軀收舍利建塔當此土周平王三十年庚子歲也 有著身見者求度於毘多毘多曰求度之法要信吾言不違吾教其人曰旣來投師固當聞命毘多乃化一險崖山聳喬木令其上樹又於樹下化作大坑深廣千肘又令放脚其人受教卽放二脚令放一手便放一手令復放手其人答言若復放手便墮坑死毘多曰先約受教云何違我是時其人身愛卽滅放手而墮不見樹坑卽證道果

佛祖綱目卷第六 終

華亭居士王元瑞施刻此卷 青蓮居士對
會稽馬存預書 上元葉應儒刻
崇禎壬申孟夏

佛祖綱目卷第六
 聖不具赫良惟攝錄
 曰次辟受於云爾靈其最執其人良矣謂然於
 一毛令其效于其人答言昔對於于對靈京天
 下限又令如神其人矣然明於二神令於一千

佛祖綱目卷第七

洪字號

甲子

周桓王三年起

乙酉

莊王元年

庚子

釐王元年

乙巳

惠王元年

癸亥

周惠王十九年止

周莊王十年甲午夏五月五日恒星不現星殞

如雨乃西方文殊菩薩於雪山化五百仙人而

歸本國光明掩於常星不現也

巳五祖提多迦傳法彌遮迦

提多迦

此云通真量

摩伽陀國人初名香衆生時父夢金

日自屋而出照耀天地前有大山諸寶嚴飾山嶺泉

湧滂沱四流後遇邈多尊者爲解之曰寶山者吾身

撰述
也泉湧者法無盡也日從屋出者汝今入道之相也
照耀天地者汝智慧超越也因為更今名提多迦聞
偈已踊躍述偈曰巍巍七寶山常出智慧泉回為真
法味能度諸有緣趣多亦說偈曰我法傳於汝當現
大智慧金日從屋出照耀於天地提多迦聞偈設禮
奉持後至中印度彼國有八千大仙彌遮迦為首聞
提多迦至率眾瞻禮謂提多迦曰昔與師同生梵天
我遇阿私陀仙授我仙法師逢十力弟子修習禪那
自此報分殊途已經六劫提多迦曰支離累劫誠哉
不虛今可捨邪歸正以入佛乘彌遮迦曰昔阿私陀

仙人授我記云汝却後六劫當遇同學獲無漏果今
也相遇非宿緣耶願師慈悲令我解脫提多迦即度
出家命諸聖授戒其餘仙眾始生我慢提多迦示大
神通於是俱發菩提心一時出家提多迦乃告彌遮
迦曰昔如來以大法眼藏密付迦葉展轉相授而至
於我我今付汝當護念之乃說偈曰通達本法心無
法無非法悟了同未悟無心亦無法說偈已躡身虛
空作十八變火光三昧自焚其軀彌遮迦與八千比
丘同收舍利於班茶山中起塔供養當此土周莊王
五年己丑歲也

撰述

佛祖綱目卷第七

佛祖綱目卷第七 終

華亭居士王元瑞池刻此卷 青蓮居士對
會稽馬存預書 上元葉應週刻
崇禎壬申孟夏

佛祖綱目卷第七 終
華亭居士王元瑞池刻此卷 青蓮居士對
會稽馬存預書 上元葉應週刻
崇禎壬申孟夏

佛祖綱目卷第八 荒字號

甲子 周惠王三 庚午 襄王元年 癸卯 頃王元年 巳酉 匡王元年 乙卯 定王九年 癸亥 周定王九年止

甲六祖彌遮迦傳法婆須蜜

彌遮迦中印度人既得法於提多迦已遊化至北天竺國見雉堞之上有金色祥雲嘆曰斯道人氣也必有大士為吾法嗣乃入城於闐闐間有一人手持酒器迎而問曰師何方而來欲往何所彌遮迦曰從自心來欲往無處彼曰識我手中物否彌遮迦曰此是觸器而負淨者彼曰師識我否彌遮迦曰我即不識

撰述
識卽非我復謂之曰汝試自稱名氏吾當後示本因
彼說偈答曰我從無量劫至於生此國本姓頗羅墮
名字婆須蜜彌遮迦曰我師提多迦說世尊昔遊比
印度語阿難言此國中吾滅度後三百年有一聖人
姓頗羅墮名婆須蜜而於禪祖當獲第七世尊記汝
汝應出家彼乃置器作禮側立而言曰我思往劫嘗
作檀那獻一如來寶座彼佛記我曰汝於賢劫釋迦
法中宣傳至教今符師說願加度脫彌遮迦卽與披
剃復圓戒相乃告之曰正法眼藏今付於汝勿令斷
絕乃說偈曰無心無可得說得不名法若了心非心

始解心心法彌遮迦說偈已入師子奮迅三昧躡身
虛空高七多羅樹却復本座化火自焚婆須蜜收靈
骨貯七寶函建浮圖置於上級當此土周襄王十五
年甲申歲也

丁震旦國李耳生

周定王三年九月十四日老子生於楚國陳郡苦縣
賴鄉曲仁里姓李氏名耳字伯陽謚曰聃在母胎八
十一年剖左脇而生生卽皓然故號老子生於李樹
下故姓李黃色美眉長耳大目鼻有雙柱耳有三門
釋迦會中老子爲迦葉菩薩經云迦葉應生震旦示

撰述

號老子設無外之教以治國假神仙之術以治身佛
滅至老子生凡三百四十六年

佛祖綱目卷第八終

華亭居士王元瑞施刻此卷
會稽馬存預書男之栢刻
崇禎壬申孟夏
青蓮居士對

佛祖綱目卷第九號

甲子周定王十年起丙子周景王七年止庚寅靈王元年丁巳景王元年癸亥

辛未七祖婆須蜜傳法佛陀難提

婆須蜜北天竺國人姓頗羅墮常服淨衣執酒器遊
行里閤或吟或嘯人謂之狂及遇彌遮迦宣如來往
誌自省前緣投器出家受法行化至迦摩羅國廣興
佛事於法座前忽有一智者自稱我名佛陀難提今
與師論義婆須蜜曰仁者論卽不義義卽不論若擬
論義終非義論難提知婆須蜜義勝心卽欽服曰我

支那

佛祖綱目卷九

撰述
願求道露甘露味婆須蜜遂與剃度而授具戒復告
之曰如來正法眼藏我今付汝汝當護持乃說偈曰
心同虛空界示等虛空法證得虛空時無是非非法
偈已婆須蜜卽入慈心三昧時梵王帝釋及諸天衆
俱來作禮而說偈言賢劫衆聖祖而當第七位尊者
哀念我請爲宣佛地婆須蜜從三昧起示衆曰我所
得法而非有故若識佛地離有無故語已還入三昧
示涅槃相難提卽於本座起七寶塔以葬全身當此
土周定王十七年辛未歲也

庚辰震旦國孔丘生

商帝乙之子微子始封於宋十三世孔防叔徙居於
魯國陬邑平鄉防叔子伯夏伯夏子叔梁紇先娶鄒
氏女生子孟皮不才後娶顏氏女名徵在禱於尼丘
山而生孔子遂名丘字仲尼誕之夕二龍逸室五老
降庭顏氏之房聞鈞天之樂身長九尺六寸腰帶十
圍垂手過膝月角日準河目海口龍顏方顙鳳顙燕
頰亂鬚虎視眉有十二采目有六十四理時周靈王
二十一年十一月四日魯襄公二十二年也釋迦會
中孔子爲孺童菩薩顏回爲月光菩薩經云閻浮界
內有震旦國我遣三聖在中化導人民慈哀禮義具

撰述

足佛滅至孔子生凡四百年

佛祖綱目卷第九 終

華亭居士王元瑞施刻此卷 青蓮居士對
會稽馬存預書上元業應儒刻
崇禎壬申孟夏



佛祖綱目卷第十

月字號

甲子

周景王八年

壬午

敬王元年

癸亥

周敬王四十二年止

丙寅 八祖佛陀難提傳法伏馱蜜多

佛陀難提迦摩羅國人姓瞿曇氏頂有肉髻辯捷無礙初遇婆須蜜傳佛心印既而領徒行化至提迦國毘舍羅家見舍上有白光上騰謂其徒曰此家有聖人口無言說真大乘器不行四衢知觸穢耳言訖長者出致禮問何所須難提曰我求侍者長者曰我有一子名伏馱蜜多年已五十口未曾言足未曾履難提曰如汝所說真吾弟子伏馱蜜多聞之遽起禮拜

而說偈曰父母非我親誰是最親者諸佛非我道誰爲最道者佛陀難提乃以偈答曰汝言與心親父母非可比汝行與道合諸佛心卽是外求有相佛與汝不相似欲識汝本心非合亦非離伏馱窣多聞偈已便行七步難提遂曰此子昔曾值佛悲願廣大慮父母愛情難捨故不言不履耳長者遂捨令出家難提尋授具戒復告之曰我今以如來正法眼藏付囑於汝勿令斷絕乃說偈曰虛空無內外心法亦如此若了虛空故是達真如理伏馱窣多承難陀付囑卽起身虛空散衆寶花以偈讚曰我師禪祖中當得爲第

八法化衆無量悉獲阿羅漢爾時難陀忽起本座現大神變却復本座儼然寂滅衆卽其所興建寶塔閱其全身時當此土周景王十年丙寅歲也

壬午震旦國李耳西入流沙

周簡王四年李耳仕周爲守藏吏十三年遷爲柱下史自是五十四年一職不遷時人目爲吏隱敬王元年耳年八十六以王室凌遲遂去周西入函谷關關令尹喜見紫雲西邁知有道人當度遂迎設禮耳乃爲著道德經五千言與尹喜遂西入流沙至罽賓國見浮屠自傷不及乃對像說偈云我生何以晚佛出

一何蚤不見釋迦文心中常懊惱後莫知所終

甲寅九祖伏馱蜜多傳法脇尊者

伏馱蜜多提伽國人姓毘舍羅既受佛陀難提付囑後行化至中印度有長者香蓋携一子而來瞻禮曰此子處胎六十歲因號難生復嘗會一仙謂此兒骨相非常當爲法器今遇尊者可捨令出家蜜多卽與落髮羯磨之際祥光燭座仍感舍利三七粒現前自此精進忘疲未幾蜜多告曰如來大法眼藏今付於汝汝護念之乃說偈曰真理本無名因名顯真理受得真實法非真亦非僞蜜多付法已卽入滅盡三昧

而般涅槃衆以香油旃檀闍維收舍利建塔於那爛陀寺當此土周敬王三十三年甲寅歲也

壬戌震旦國孔丘示寂

孔子年十七朝周問禮於老子訪樂於萇弘自周反魯周敬王十九年爲魯中都宰定養生送死之節長幼異食強弱異任一年而四方諸侯則焉魯定公曰以此法治魯何如曰雖天下可也二十一年爲魯司空立五土之性而物各得其所生之宜二十二年魯定公與齊景公會於夾谷孔子攝相事齊人歸所侵之田以謝過孔子爲大司寇七日而誅少正卯墮三

都之城強公室弱私家尊君卑臣政化盛行三月大治鬻羔豚者弗飾價男女別於途道不拾遺四方之客至乎邑者不求有司定公受齊女樂三日不聽政郊不致膳俎孔子遂行適衛二十三年孔子自衛適陳過匡匡人以孔子貌似陽貨圖之既解適宋與弟子習禮大樹下司馬桓魋欲害之拔其樹三十二年孔子至陳三十五年楚攻陳孔子在陳絕糧復去陳反衛三十六年孔子自衛反魯刪詩書定禮樂繫周易作春秋七十子之疇會集孔子所言以爲論語三十九年魯哀公十四年魯哀公西狩獲麟孔子傷麟之出非

其時遂絕筆於春秋四十一年四月巳丑孔子蚤作負手曳杖逍遙於門歌曰泰山其頽乎梁木其壞乎哲人其萎乎子貢聞之曰夫子殆將病也趨而入孔子曰予疇昔之夜夢奠於兩楹之間明王不興而天下其孰能宗予予殆將死也蓋寢疾七日而歿年七十二葬魯城北泗水上弟子皆服心喪三年喪畢相訣而去惟子貢廬於塚六年弟子及魯人往從塚而家者百餘室因命曰孔里弟子三千人身通六藝者七十有二人孔子生鯉字伯魚鯉生伋字子思伋學於曾子作中庸後有孟軻又受業於子思之門人總

之冥合如來正法眼藏號曰儒宗初商太宰諮問孔子曰夫子聖者歟曰丘博學強記非聖人也三王聖者歟曰三王善用智勇聖非丘所知五帝聖者歟曰五帝善用仁信聖非丘所知三皇聖者歟曰三皇善用時政聖非丘所知太宰大駭曰然則孰為聖人乎夫子動容有間對曰丘聞西方有大聖焉不治而不亂不言而自信不化而自行蕩蕩乎人無能名焉

佛祖綱目卷第十 終

華亭居士王元瑞施刻此卷 青蓮居士對會稽馬存預書 上元業應週刻 崇禎壬申孟夏

佛祖綱目卷第十一 盈字號

甲子 周敬王四十四年起 丙寅 元王 癸酉 貞定王 辛丑 考王

丙辰 威烈王元年 癸亥 周威烈王八年止

巳亥 十祖脇尊者傳法富那夜奢

脇尊者中印度人本名難生處胎六十年將誕之夕母夢白象載一寶座座置一明珠從門而入既覺遂生生而祥光燭室體有奇香及長雖穀食絕無穢滓後值伏馱蜜多執侍左右未嘗睡眠謂其脇不至席遂號脇尊者初至華氏國憇一樹下右手指地而告衆曰此地變金色當有聖人入會言訖即變金色時

有長者子富那夜奢合掌前立脇問曰汝從何來答曰我心非往脇曰汝何處住答曰我心非止脇曰汝不定耶答曰諸佛亦然脇曰汝非諸佛答曰諸佛亦非脇因說偈曰此地變金色預知有聖至當坐菩提樹覺華而成已夜奢復說偈曰師坐金色地常說真實義回光而照我令入三摩諦脇知其意卽度出家復具戒品乃告之曰如來大法眼藏今付於汝汝護念之乃說偈曰真體自然真因真說有理領得真真法無行亦無止脇付法已卽現神變而入涅槃化火自焚舍利從空而下不可勝數四衆盛以衣祴隨處

建塔供養當此土周貞定王二十七年己亥也 北天竺有無着弘闡宗教其弟天親初尚小乘造論五百部無着觀其根緣將熟乃假疾召還甫近一驛遣一弟子往迎夜同館宿弟子誦偈云若人欲了知三世一切佛應觀法界性一切惟心造天親聞之豁然開悟且悔昔誹斥罪過皆緣舌根卽從臥起手執利刀欲截其舌無着遙知伸臂捉住諭之曰汝悟大乘蓋其時矣昔以舌毀宜以舌讚苟斷舌不言其利安在天親乃止戴星而行洎覲無着諦聽慈旨便造大乘論累五百部時號千部論師一日無着入法光定

夜昇兜率請問彌勒菩薩金剛經義彌勒說八十頌
無着約十八住處造論二卷天親約斷二十七疑造
論三卷天親復爲衆講婆沙論以一日所講之義乃
造一頌攝之且遍造諸國論師諸師不能解繇是自
造長行釋頌即今俱舍論是一日天親從彌勒內宮而下無
着問曰人間四百年彼天爲一晝夜彌勒於一時中
成就五百億天子證無生法恐未審說甚麼法天親
曰也只說這箇法止是梵音清雅令人樂聞

佛祖綱目卷第十一終

華亭居士王元瑞施刻此卷 青蓮居士對會稽馬存預書 上元業應週刻

佛祖綱目卷第十二 吳字號

甲子周威烈王九年起 庚辰安王元年 丙午烈王元年 癸丑顯王元年 癸

亥周顯王十一年止

戊 十一 愾富那夜奢傳法馬鳴

富那夜奢華氏國人姓瞿曇氏父寶身有子七人夜
奢最少幼卽與諸兄異尚嘗曰若遇大士坐於道場
我則詣彼親近隨喜及遇脇尊者遂授法夜奢教被
無量得果者且五百矣後至波羅柰國有一長者來
趣其會夜奢謂衆曰汝等識此來者耶佛記聖者馬
鳴紹吾法者也於是馬鳴致禮問曰我欲識佛何者

卽是夜奢曰汝欲識佛不識者是馬鳴曰佛旣不識
焉知是乎夜奢曰旣不識佛焉知不是馬鳴曰此是
鋸義夜奢曰彼是木義乃問鋸義者何曰與師平出
馬鳴却問木義者何曰汝被我解馬鳴豁然省悟遂
求剃度夜奢謂衆曰此大士者昔爲毘舍利國王以
其國有一類裸人如馬裸露王運神通分身爲蠶彼
乃得衣後復生中印度馬人感戀悲鳴故號馬鳴如
來懸記滅度後六百年馬鳴當於波羅柰國摧伏異
道繼吾傳化今正是時遂告之曰如來大法眼藏今
付於汝卽說偈曰迷悟如隱顯明暗不相離今付隱

顯法非一亦非二付法已卽現神變湛然圓寂衆興
寶塔以闕全身當此土周安王十九年戊戌歲也
宗鏡錄云西天韻陀山中有一羅漢名富樓那馬鳴
往見端坐林中志氣渺然若不可測馬鳴語之曰沙
門說之敢有所明要必屈汝我若不勝刎頸以謝羅
漢默然容無負色亦無勝顏扣之數四曾無應情鳴
退自思惟我負矣彼勝矣彼安無言故無可屈吾以
言之雖知言有可屈自吾未免於言真可媿矣遂投
出家此說與傳燈不同并識之

撰述

佛祖綱目卷第十二 終

華亭居士王元瑞施刻此卷 青蓮居士對
會稽馬存預書男之稱刻
崇禎壬申孟夏

佛祖綱目卷第十三 辰字號

甲子 周顯王十一年起 辛丑 慎親王元年 丁未 赧王元年 癸亥 周赧王十

七年止

甲十二祖馬鳴傳法迦毘摩羅

馬鳴大士波羅奈國人亦名功勝以有作無作諸功德最爲殊勝故名焉旣受心印於夜奢說法度人摧諸異論有一外道來索論義集國王大臣及四衆俱會論場馬鳴曰汝義以何爲宗曰凡有言說我皆能破馬鳴乃指國王曰當今國土康寧大王長壽請汝破之外道屈服後於華氏國轉妙法輪忽有老人座

支那

佛祖綱目卷十三

撰述
前付地馬鳴謂衆曰此非庸流當有異相言訖不見
俄從地湧出一金色人復化爲女子右手指馬鳴而
說偈曰稽首長老尊當受如來記今於此地上宣通
第一義說偈已瞥然不見馬鳴曰將有魔來與吾較
力有頃風雨暴至天地晦冥馬鳴曰魔之來信矣吾
當除之卽指空中現一大金龍奮發威神震動山岳
馬鳴儼然於座魔事隨滅經七日有一小蟲大若螭
頭潛形座下馬鳴以手取之示衆曰斯乃魔之所變
盜聽吾法耳乃放之今去魔不能動馬鳴告之曰汝
但皈依三寶卽得神通遂復本形作禮懺悔馬鳴問

曰汝名誰耶眷屬多少曰我名迦毘摩羅有三千眷
屬馬鳴曰盡汝神力變化若何曰我化巨海極爲小
事馬鳴曰汝化性海得否曰何謂性海我未嘗知馬
鳴卽爲說性海曰山河大地皆依建立三昧六通繇
茲發現迦毘摩羅聞言遂發信心與徒衆三千俱求
剃度馬鳴乃召五百羅漢與授具戒復告之曰如來
大法眼藏今當付汝汝聽偈言隱顯卽本法明暗元
不二今付悟了法非取亦非離付囑已卽入龍奮迅
三昧挺身空中如日輪相然後示滅四衆藏真體於
龍龕時周顯王四十七年甲午也馬鳴造甘蔗論十

撰述

萬偈又造起信等論善能開誘度人無量

佛祖綱目卷第十三 終

華亭居士王元瑞施刻此卷 青蓮居士對會稽馬存預書男之梅刻

崇禎壬申仲夏



佛祖綱目卷第十四 宿字號

甲子 周赧王十一年起 丙午 秦昭襄王元年 壬子 秦莊襄王元年 乙卯 秦始皇

皇元 癸亥 秦始皇九年止

秦嬴姓起昭襄王丙午止子嬰甲午共六主合

四十九年

壬辰 十三祖迦毘摩羅傳法龍樹

迦毘摩羅華氏國人初為外道有徒三千通諸異論後於馬鳴尊者得法領徒至西印度彼有太子名雲自在仰摩羅名請於宮中供養摩羅曰如來有教沙門不得親近國王大臣有勢之家雲自在曰今我國

城之北有大山焉山中有石窟師可禪寂於此否
摩羅曰諾卽入彼山行數里逢一大鱗摩羅直前不
顧繞摩羅身摩羅因與授三皈依鱗聽訖而去摩羅
將至石窟復有一老人素服而出合掌問訊摩羅曰
汝何所止答曰我昔嘗爲比丘多樂寂靜有初學比
丘數來請益而我煩於應答起嗔恨想命終墮爲鱗
身住是窟中今已千載適遇尊者獲聞戒法故來謝
耳摩羅曰此山更有何人居止曰此去十里有大樹
蔭覆五百大龍其樹王名龍樹嘗爲龍衆說法我亦
聽受耳摩羅遂與徒衆詣彼龍樹出迎曰深山孤寂

龍鱗所居大德至尊何枉神足曰吾非至尊來訪賢
者龍樹默念此師得決定性明道眼否是大聖繼真
乘否摩羅曰汝雖心語我已意知但辨出家何慮我
之不聖龍樹聞已悔謝摩羅卽與度脫及五百龍衆
俱受具戒復告之曰今以如來大法眼藏付囑於汝
諦聽偈言非隱非顯法說是真實際悟此隱顯法非
愚亦非智付法已卽現神變化火焚身龍樹收五色
舍利建塔焉當此土周赧王四十六年壬辰歲也
龍樹亦名龍勝南天竺人乳哺中聞諸梵志誦四韋
駄凡四萬偈皆達句義長而善知衆藝天文地理星

締圖織之屬無不綜練後因術罹禍遂悟慾爲苦本
出家入石窟棲止龍樹爲龍衆所歸遇摩羅付法於
九十日誦通閻浮所有經書復念世界佛經雖妙句
義未盡我當更爲敷演開悟後學大龍菩薩便以神
力接入龍宮開七寶函與諸方等經典九十日中通
解甚多龍曰汝今閱經爲徧未耶樹曰汝經無量不
可得盡我今所讀足過閻浮十倍龍曰忉利天上諸
經復過此中百千萬倍樹於龍宮修行深入無生龍
送出宮是後大弘佛法造大無畏等論數十萬偈

論是其一品即
大智度論是

經云善逝涅槃後未來世當有南天

中觀

竺比丘厥號爲龍樹能破有無宗顯我大乘法得初
歡喜地往生安養國 樹入龍宮看藏見華嚴經有
三本上本十三世界微塵數偈一四天下微塵數品
中本四十九萬八千八百偈一千二百品下本十萬
偈四十八品上本非佛不能知中本惟住地菩薩乃
能知之遂記下本回歸西土西土傳至震旦八十卷
經三十九品品分爲七處九會一會菩提場說六品
十一卷普賢爲會主二會普光明殿說六品四卷文
殊爲會主三會忉利天說六品三卷法慧爲會主四
會夜摩天說四品三卷功德林爲會主五會兜率天

說三品十二卷金剛幢為會主六會他化天說一品
金剛藏為會主七重會普光明殿說十一品十三卷
普賢與如來普賢品談平等因如來出現品談平等
果八三會普光明殿說一品七卷亦普賢九會逝多
林說一品二十一卷則如來與善友也此乃下本前
分三萬六千偈尚有六萬四千偈九品在西土

佛祖綱目卷第十四

終

華亭居士王元瑞施刻此卷
會稽馬存預書男之栢刻
崇禎壬申仲夏
青蓮居士對

佛祖綱目卷第十五

列字號

甲子

秦始皇
十年起

壬辰

秦二世
元年

乙未

漢高祖
元年

丁未

漢惠
帝元

甲寅

呂太后
元年

壬戌

漢文帝
元年

癸亥

漢文帝
二年止

漢劉姓西漢起高祖元年乙未止更始二年甲

申十四帝合二百十五年王莽篡位東漢起光

武建武元年乙酉止漢獻帝建安二十五年庚

子十二帝合一百九十五年二漢合四百二十

五年

丑十四祖龍樹傳法迦那提婆

龍樹既得法於摩羅已後至南印度彼國之人多信

福業樹爲說法通相謂曰人有福業世間第一徒言佛性誰能觀之樹曰汝欲見佛性先須除我慢彼人曰佛性大小樹曰非大非小非廣非狹無福無報不死不生彼聞理勝悉回初心樹復於座上現自在身如滿月輪一切衆惟聞法音不覩樹相彼衆中有長者子名迦那提婆謂衆曰識此相否衆曰目所未覩安能辨識提婆曰此是尊者現佛性體相以示我等何以知之蓋以無相三昧形如滿月佛性之義廓然虛明言訖輪相卽隱復居本座而說偈言身現圓月相以表諸佛體說法無其形用辨非聲色彼衆聞偈

頓悟無生成願出家以求解脫樹卽爲剃髮命諸聖授具時南印度有五千外道與大幻術王與國人靡然從之不知向佛樹爲感慨易其威儀白衣持幡每俟王出則趨其前或隱或顯如是者七載王一日忽異之問曰汝何者而前吾行追則不得縱之不去樹曰吾是智人知一切法王曰汝知諸天今何所爲樹曰天今與修羅方戰王曰何以明之樹曰頃則徵矣俄有戈戟手足自空紛然而下王遂大敬信命諸外道皆歸禮樹樹悉化之令歸三寶後謂上首弟子迦那提婆曰如來大法眼藏今當付汝聽吾偈曰爲明

隱顯法方說解脫理於法心不證無嘆亦無喜付法
已入月輪三昧廣現神變復就本座凝然入寂及七
日天雨舍利樹復於座指空語衆曰昔拘那含佛弟
子摩訶迦尊者有三願一爲佛時凡有聖士化度則
天澍雨及其身皆爲舍利二大地所生皆堪爲藥療
衆生病三凡有智者皆得所知微妙以通宿命今雨
舍利摩訶迦神力也言已復寂迦那提婆與衆建塔
闕其全身當此土秦始皇三十五年己丑歲也

佛祖綱目卷第十五

終

華亭居士王元瑞施刻此卷 青蓮居士對
會稽馬存預書男之梅刻

佛祖綱目卷第十六

張字號

甲子

漢文帝
三年起

乙酉

景帝
元年

辛丑

武帝建元
元年

元
年號自此始

丁未

改元
元光

癸丑

改元
元朔

己未

改元
元符

癸亥

漢武帝元
符五年止

庚辰 十五祖迦那提婆傳法羅睺羅多

迦那提婆南天竺人姓毘舍羅初求福業兼樂辯論
後謁龍樹將及門龍樹知是智人先遣侍者以蒲鉢
水置於座前提婆觀之卽以一鍼投之而進欣然契
會龍樹卽爲說法不起於座現月輪相提婆旣得法
已名震五天然猶以人不信用其言爲憂時天竺有
大自在天人身真金色高二丈人有所求皆如所願

撰述
提婆造廟見之萬眾隨入像果瞬視若怒提婆曰神則神矣何其小哉正當以威靈感人智德化物而假金爲軀玻璃爲目以妖世非所望也卽梯其肩鑿出目睛觀者疑之曰大自在天乃爲一小婆羅門所折困耶提婆曰神明遠大故以近事試我我得其心故敢爾也於是辨供是夜大自在天降以受之曰汝得我心人得我形汝以心供人以質饋知而敬我者汝畏而誣我者人然汝供甚美但乏我所欲提婆曰神須何物大自在天人曰我缺左目能施我乎提婆笑卽出自已目與之愈出而愈不竭自旦及暮出目睛

數萬神讚曰善哉摩訶真上施也欲何所求提婆曰我稟明於心不假外也後至迦毘羅國彼有長者曰梵摩淨德一日園樹生耳如菌味甚美惟長者與第二子羅睺羅多取而食之取已隨長盡而復生自餘親屬皆不能見提婆知其宿因遂至其家長者乃問其故提婆曰汝家昔會供養一比丘然此比丘道眼未明以虛沾信施故報爲木菌惟汝與子精勤供養得以享之餘則否矣又問長者年多少答曰七十有九提婆乃說偈曰入道不通理復身還信施汝年八十一此樹不生耳長者聞偈已深加嘆伏且曰弟子

衰老不能事師願捨次子隨師出家提婆曰昔如來記此子當第二五百年爲大教主今之相遇蓋符宿因卽與剃髮至巴連弗城聞諸外道欲障佛法計之旣久提婆乃執長幡入彼衆中彼問曰汝何不前提婆曰汝何不後彼曰汝似賤人提婆曰汝似良人彼曰汝解何法提婆曰汝百不解彼曰我欲得佛提婆曰我灼然得佛彼曰汝不合得提婆曰元道我得汝實不得彼曰汝旣不得云何言得提婆曰汝有我故所以不得我無我故我自當得彼詞旣屈乃問提婆曰汝名何等曰我名迦那提婆彼旣夙聞提婆名乃

悔過致謝時衆中猶互興問難提婆折以無碍之辨繇是歸伏乃告上足羅睺羅多而付法眼偈曰本對傳法人爲說解脫理於法實無證無終亦無始說偈已入奮迅定身放八光而歸寂滅學衆興塔供養當此土漢文帝十九年庚辰歲也 漢武帝元符二年

驃騎將軍霍去病討匈奴過居延擒休屠王獲其金人率長丈餘帝以爲大神列於甘泉宮不祭祀但燒香禮拜而已此佛道流通之漸也及開西域遣張騫使大夏還云身毒國有浮屠之教云元符三年京師掘昆明池得黑灰以問東方朔朔曰可問西域胡道

撰述

佛祖綱目卷第十六

人及後永明中摩騰至有問之者騰曰此劫灰也

佛祖綱目卷第十六 終

華亭居士王元瑞施刻此卷 青蓮居士對
會稽馮存預書 上元葉應週刻
崇禎壬申仲夏

（Faded text area, likely bleed-through from the reverse side of the page. Some characters like '佛' and '祖' are faintly visible.)

佛祖綱目卷第十七 寒字號

甲子漢武帝元符六年起乙丑改元辛未改元丁丑改元辛

巳改元乙酉改元巳丑改元癸巳改元乙未改元丙

年改元辛丑改元丁未改元戊申改元壬子改元丙

辰改元庚申改元癸亥改元壬子改元丙

戊辰十六祖羅睺羅多傳法僧伽難提

羅睺羅多迦毘羅國人行化至室羅筏城有河名曰
金水其味殊美中流復現五佛影羅睺羅多告眾曰
此河之源凡五百里有聖者僧伽難提居於彼處佛
誌一千年後當紹聖位語已領諸學眾遡流而上至

支那

佛祖綱目卷第十七

佛藏經卷之九
撰述
彼見僧伽難提安坐入定羅睺羅多與衆伺之經三
七日方從定起羅睺羅多問曰汝身定耶心定耶難
提曰身心俱定羅多曰身心俱定何有出入難提曰
雖有出入不定相如金在井金體常寂羅多曰若
金在井若金出井金無動靜何物出入難提曰言金
動靜何物出入言金出入金非動靜羅多曰若金在
井出者何金若金出并在者何物難提曰金若出井
在者非金金若在井出者非物羅多曰此義不然難
提曰彼義非著羅多曰此義當墮難提曰此義不成
羅多曰彼義不成我義成矣難提曰我義雖成法非

我故羅多曰我義已成我無我故難提曰我無我故
復成何義羅多曰我無我故成汝義難提曰仁者
師誰得是無我羅多曰我師迦那提婆證是無我難
提以偈贊曰稽首提婆師而出於仁者仁者無我故
我欲師仁者羅多答偈曰我已無我故汝須見我我
汝若師我故知我非我我難提心意豁然即求度脫
羅多曰汝心自在非我所繫語已即以右手擎金鉢
舉至梵宮取彼香飯將齋大衆大衆忽生厭惡之心
羅多曰非我之咎汝等自業即命難提分座同食衆
復訝之羅多曰汝不得食皆繇此故當知與吾分座

者卽過去娑羅樹王如來也愍物降跡汝輩亦莊嚴劫中已至三果而未證無漏者衆曰我師神力斯可信矣彼云過去佛者卽竊疑焉難提知衆生慢乃曰世尊在日世界平正無有丘陵江河溝洫水悉甘美草木滋茂國土豐盈無八苦行十善自雙樹示滅八百餘年世界丘墟草木枯瘁人無至信正念輕微不信真如惟愛神力言訖以右手漸展入地至金剛輪際取甘露水以琉璃器持至會所大衆見之卽時欽慕悔過作禮於是羅多命難提而付法眼偈曰於法實無證不取亦不離法非有無相内外云何起難提

聞命敬奉勤至復說偈贊曰善哉大聖者心明逾日月一光照世界暗魔無不拔羅睺羅多付法已安坐歸寂四衆建塔當北土漢武帝二十八年戊辰也

丁十七祖僧伽難提傳法伽耶舍多

僧伽難提室羅筏城人實莊嚴王之子生而能言常讚佛事七歲卽厭世樂以偈告其父母曰稽首大慈父和南骨血母我今欲出家幸願哀愍故父母固止之遂終日不食乃許其在家出家號僧伽難提復命沙門禪利多爲之師積十九載未嘗退倦每自念言身居王宮胡爲出家一夕天光下燭見一路坦平不

覺徐行約十里許至大巖前有石窟焉乃燕寂於中
父既失子卽擯禪利多出國訪尋其子不知所在經
十年僧伽難提遇羅睺羅多得法得記已行化至摩
提國忽有涼風襲衆身心悅適非常而不知其然難
提曰此道德之風也當有聖者出世嗣續祖燈乎言
訖以神力攝諸大衆遊歷山谷食頃至一峯下謂衆
曰此峯嶺有紫雲如蓋聖人居此矣卽與大衆徘徊
久之見山舍一童子持圓鑑直造難提前難提問汝
幾歲耶曰百歲提曰汝年尚幼何言百歲童曰我不
會理正百歲耳難提曰汝善機耶童曰佛言若人生

百歲不會諸佛機不如生一日而得決了之難提曰
汝手中者當何所表童曰諸佛大圓鑑內外無瑕翳
兩人同目見心眼皆相似彼父母聞子語卽捨令出
家難提携至本處受具戒訖名伽舍耶多他時聞風
吹殿鈴聲難提問曰鈴鳴耶風鳴耶舍多曰非風鈴
鳴我心鳴耳難提曰心復誰乎舍多曰俱寂靜故難
提曰善哉善哉繼吾道者非子而誰卽付法眼偈曰
心地本無生因地從緣起緣種不相妨華果亦復爾
僧伽難提既付法已右手攀樹而化大衆議曰尊者
樹下歸寂其垂蔭後裔乎將奉全身於高原建塔衆

撰述

力不能舉以諸象力挽之亦不動遂就樹下焚之身盡樹更蔚鬱當此土漢昭帝十三年丁未歲也

佛祖綱目卷第十七

華亭居士王元瑞施刻此卷
會稽馬存預書 業應儒刻
崇禎壬申仲夏 青蓮居士對

佛祖綱目卷第十八 來字號

甲子 漢宣帝五鳳元年起 戊辰 甘露元年 壬申 黃龍元年 癸酉 元帝初元元年

戊寅 改元永光 癸未 建昭元年 戊子 改元景寧 己丑 成帝建元元年 癸巳

改元 丁酉 陽朔元年 辛丑 鴻嘉元年 乙巳 改元永始 己酉 改元元延 癸亥

丑 改元 乙卯 哀帝建始元年 己未 改元 辛酉 平帝元始元年 癸亥

漢平帝元始二年止

壬寅 鴻嘉二年光祿大夫劉向撰神仙傳云黃

帝以下迄今得仙道者百四十九人其七十四

人已見佛經矣又言博觀典籍往往見有佛經

己未元壽元年景憲使大月氏國還得浮圖經

支那

佛祖綱目卷十八

時莫有識者


戊申十八祖伽耶舍多傳法鳩摩羅多

伽耶舍多摩提國人也姓鬱頭藍父天蓋母方聖嘗夢大神持鑑因而有娠凡七日而誕肌體瑩如琉璃未嘗洗沐自然香潔幼好閑靜語非常童持鑑出遊遇僧伽難提尊者付法後領徒至大月氏國見一婆羅門舍有異氣舍多將入彼舍舍主鳩摩羅多問曰是何徒衆舍多曰是佛弟子彼聞佛號心神竦然卽時閉戶舍多良久扣其門羅多曰此舍無人舍多曰答無者誰羅多聞語知是異人遽開門延接舍多指

其舍簷之下犬宿之處謂羅多曰汝父埋金於此今爲犬以守之遂掘地果得金復謂羅多曰昔世尊記曰吾滅後一千年有大士出現於月氏國紹隆玄化今汝值吾應斯嘉運於是羅多發宿命智投誠出家舍多度之授具已付法眼偈曰有種有心地因緣能發明於緣不相礙當生生不生伽耶舍多旣付法已躡身虛空現十八變化火光三昧自焚其身衆以舍利建塔當此土漢成帝二十年戊申歲也

佛祖綱目卷第十八

終



三十八